

Izesu Kilistoni Gakó Lamaná Zoní Luhuva Gizamó

*Ómasímini agepagú gakotó mina vema vegená
loló imó*

¹ Netá matá apí oko utó i gamena nene, Ómasímini agepagú gakotó mina vémo nene hanuva minake, mino-loko iteko minamó. Lá noike, Ómasímini amatoka minamó. Itó agepagú gakotó mina ve nenémo Ómasi minamó.

² Áisi nene apí oko Ómasiloka minamó.

³ Minoake nene, netá mukí ale utó o asú imó. Netá hámakoláa áisi minamigo utó osá amimó neve.

⁴ Eza nene alévolé oko minoakalímini amelaho loló oko minake, alévolé oko minoaká nenémo vegená hize hanatoketamó.

⁵ Lapaná nenémo límugusigú hize hanatokago, límugusi nenémo lapaná nene apele helemimó.

⁶ * Ómasímo ve makó alémo etó oake, amiseleke-ago, voko utó imó, agulizá Zoní.

⁷ Áisi nene vegená mukí keza aí gakó giliiki gili alévolé itave loko lapaná nenémini gakoláa lo utó oko minamó.

⁸ Lá imóza, Zoní ezáa nene lapaná amelaho minamive. Eza hanuva lapaná amelahini gakoláagó lo utó oaká imó.

⁹ Lapaná amelaho eza numutó namató vegená hize sata okimiaká noi vémo gamena nene zupa mikasigú utó oake minamó.

* 1:6: Mat 3:1; Luk 3:1-2

¹⁰ Áisi nene mikasigú utó oakaláa nene utó imóza, mikasigú netá mukí nene áisi ale utó imó. Ale utó oake mino-loko novike lemeko mikasigú utó okago, mikasigú vegená keza aí ánigi hee hee lamamó.

¹¹ Lá ikago, ezáa ale utó i apakú utó imóza, vegenala zuhate lelikutí noize liake alími kamatoka amamó.

¹² Kigikagú aí ali gúemoláa nene Ómasímini izegi-pala zuha lilí itave loko gapo veleketamó nene aikumú gili alévolé ina vegená nenémini itave loko gele kemeaká noive.

¹³ Keza nene izóike getakutí Ómasímini vegenala lilí iki gosohá utó amave, itó lugupegú golanímini gapogú viki gosohá utó isá amave. Ómasilokatí gosohá utó iaká niave.

¹⁴ Ómasímini agepagú gakotó mina ve nenémo vegená loló oake, vogalategú minoko aleko ike, nasahilí asapulagi gakó gihilagi ale-loko limigo, ániguhá. Aí okulumakú lapaná ánigunimó nene, amelahini gipala hamokó minake amelahini lapanala lelepizigo ánigunimóma neve.

¹⁵ Aí mogonáa nene Zoní gakó napagutí láa loko lo utó imó: Nénisi ámina vemú goí oko nene neza utó amugo emane amunalotí mino-loko iteko mina ve nenazo, ámina ve alika nemege-saló noamó áisi nene není nivilegeko noave loko lo lukumumóma neve.

¹⁶ Áisi nene vegená mukitoka netá mukí asapulagi nasahilí olimikago, hagitana alekogó minoaká noune.

¹⁷ Ómasímo lokago, Mosé eza lo hukoko li gakokó

luhuva gizo limimóza, Izesu Kilistó áisi aleko iteko nasahilí nene hagitana oletake gakó gihiláa lehizeletamóma neve.

¹⁸ Ómasi nene ve makolímohe makolímohe ánigonamive. Gipala hamokó ezáa nene Ómasi noive. Eza amelahini amatoka minake, amelahini mogonáa aleloko limike lo utó oko lo lemekave.

*Monó nagamí holokimiaká vémo lo utó i gakó
(Mat 3:1-12; Mak 1:7-8; Luk 3:15-17)*

¹⁹ Zelusale numutokatí Zuta vegenalitini monó gizapa vete guguni giziaaká vegi monó zavusavegú gelekelé ve makoki kimisilikago, Zonitoka vi anitake, géisi éaga noane, gologí oletative loko lo mololeta vema noape liki loká imikago,

²⁰ ezáa mogona egamega amike lo kimike lo utó ike neza gologí oleketative loko lo mololeketa vema minamuve.

²¹ * Loko lokago, keza miní ameke goha loká itake itó géisi éagama noane. Gologí olimiaká vema velesá anitemiko okulumakutí goha ative liki lina ve Ilaizagama noape. Liki likago, eza nene Ilaizá noamuve lokago, géisi nene Ómasímini agepagutí gakó loaká ve makó Mosekitana noi ve ageva oko nominuhá vema noape. Liki likago, eza óve lokago,

²² láa lokoma geza éahoma noane. Geitoka limisilikago uhá vegenáma voko nanave loko lo kimitune. Gezakamú nanave loko nolane.

²³ * Liki likago, Zoní láa loko lo kimimó: Ómasímini agepagutí gakó loaká ve Isaiá luhuva makó láa loko gizamóma neve:

* **1:21:** Mal 4:5; Gapo 18:15,18 * **1:23:** Isa 40:3

Mikasi gomopalaló ve makolímo gakó napagutí
Guivahanímini gapo nene likigikagú ali hee
liki vilitalo, loko nolive
loko giza gakó nene nenitoka alévolé okave.

²⁴ Loko lokago, Palisaio monó vete kimisilikago
Zonitoka viki anite ve nenete

²⁵ áminamú goha loká itake lamó: Geza gologí
oletative loko lo mololeta vema minamane, itó
Ilaizaga minamane, itó Ómasímini agepagutí gakó
loaká ve ageva nominuhá vema minamanimó
nenazo, nanamú vegená nene monó nagamí
holokimiaká noane.

²⁶ Liki likago, Zoní láa loko lo kimimó: Neza veg-
ená nagamikó holokimiaká noumóza, holutikú ve
makó utó oake noimó nene lekeza ángi guni isá
amave.

²⁷ Áisi nene némegetoko ova ova noive. Ámina
veloka akohemunazo, aí gelekelé otoko hoza la-
gasó aletatomoki akohemuve.

²⁸ Loko li netá nene Petania apatoka Zota
nagamí vola helegaloka Zoní monó nagamí
holokimiaká noitó utó imó.

Ómasímini sipsip iza akaleva ángalo

²⁹ Akiake gó lago, Izesú nene Zoní noitoka an-
itekago, hotó otigí oko volane noago ángoake, láa
loko vegenáma lo kimimó: Ángalo. Volane áisi
nene Ómasímini guguni gizoakalímini sipsip iza
akaleva gihila nene numutó namató vegenalitini
lihimaváini aí amupiló itekago agohí geaká noive.

³⁰ Neza aikumú nene neza utó amugo emane
amunalotí mino-loko iteko mina ve nenazo, ámina

ve alika nemegesaló noamó áisi nene není nivi-
legeko noive loko lo lukumumóma neve.

³¹ Neza nene gozapá aí nene ánigo hee hee
lamumóza, lekeza Isilae vegenalita ámina vémini
gakola lo lukumugo gilitave loko aniteuke monó
nagamí apí oko hololeketumóma neve.

³² Loko Zoní nene loake, goha láa loko avetó ike
lo kimimó: Neza Sikalahulímo okulumakutí nama
luhusigitana oko lemeko ámina vémini amupiló
aleneigo áningumóma neve.

³³ Neza gozapá aí nene ánigo hee hee lamumóza,
monó nagamí hololikimiaká hozaló nimisili vémo
Sikalahú limike amupiló aleneiko áningatani ve áisi
nene vegená nene není Sikalahú holoketanogo ive
loko lo nimimóma neve.

³⁴ Loko litoka lemeko noigo áningumole loko mog-
onamú nene áisi nene Ómasímini gipala noive, loko
limó.

Izesuni ganá izegipala zuha

³⁵ Akiake gó lago, Zoní ave itó izegipala zuhagutí
ve lositá ámina mikasiló minamó.

³⁶ Niago, Izesú nene apá makotoka novigo,
ánigoake, izegipala losima nene láa loko lo kimimó:
Ómasímini sipsip iza akaleva áningalizo.

³⁷ Loko lokago, keza nene gakó gilikasike, Ize-
suni ámegetiki vasimó.

³⁸ Vikasigo, Izesú nene viligoko ánigoake, lekeza
nanamú niasive loko lokago, kezáini gakokutí Lavi
velemaka, lelí gakokutí nene monó gizapa vele-
maka, geza hí numukú minoaká noane.

³⁹ Liki likasigo, iki áñigalizo loko lokago, keza ámegetiki vasike, numunáa áñigasike, ho ale zohota okago, áminaloka makó mini milasimó.

⁴⁰ Zonini gakó gilikasike Izesuni ámegetasi vegutí nene makó agulizá Etulú, eza Saimon Pitani agunala.

⁴¹ Áisi nene litá oko uvolahini Saimoni áñigoake, láa loko lo amimó: Leza Mesiani mota áñigokune. (Mesiá nene Zuta vetini gakokutí, itó Kilistó nene Kiliki gakokutí, ámina agulizalímini mogonáa nene gologí oletative loko lo mololeta ve loko neve.)

⁴² Loko loake, Izesutoka alémoko vokago, Izesú nene áñigoake, láa loko lo amimó: Geza Saimoga Zonini gipalamaka, geí gugulizá Sipasí ave loko nomuluve. (Sipasí nene Zuta vetini gakokutí, itó Kiliki gakokutí nene Pitá, agulizalímini mogonáa nene geha sepepizámo.)

Pilipoko Natanaeko Izesuni ámegetiki vasimó

⁴³ Akiake gó lago, Izesú nene Galilaia mikasiuka vitove loko agata geleake, Piliponi áñigoake, geza némegetozo.

⁴⁴ Loko limó nene, Pilipó ave Etulú ave Pitá ave nene Petesaita apatokatikó minamó.

⁴⁵ Itó Pilipó nene Natanaeni áñigoake láa loko lo amimó: Mosé lo hukoko li gakoki itó Ómasímini agepagutí gakó liaká a vete la gakoki luhuva giza vema mota áñigokune. Nasaleta apatokatí Zoseheni gipala Izesunima.

⁴⁶ Loko lokago, Natanaé nene Nasaleta apatokatí nana netá lamaná makó utó itive. Loko lokago, Pilipó nene láa lokoma oko áñigozo,

⁴⁷ loko lokago, Natanaé nene Izesutoka vo anitekago, ángoake, Ángalo. Imane ve Isilae ve gihiláa nenazo, agikagú soza gakó minami ve noive.

⁴⁸ Loko lokago, Natanaé loká otake geza hitóma nougo ánganimó neve. Loko lokago, Izesú nene Pilipó velesá gelémoko amigo, nimuza za mogonaló noako ángumóma neve.

⁴⁹ Loko lokago, Natanaé láa loko limó: Monó gizapa venemaka, geza lamaná Ómasímini gipala noane. Isilae ve lelí gugulizaki ve noane.

⁵⁰ Loko lokago, Izesú láa loko limó: Nimuza za mogonaló noako ángumóma neve loko lo gumutó geleanike nenikumú gele alévolé onoape. Gelezo. Oko moloko umó imane nene avevezahaváa neve. Netá gihila gohaláa nene alíka ángoko gilinogo ane.

⁵¹ * Loko loake, miní ameko láa loko limó: Neza lamaná lo likimitoze, gililo. Lekeza okulumá koló okiko, Ómasímini ageló keza okulumakutí lumu ve gihila nenitoka tigá limigá niko ánganigave, loko limó.

2

Kana numutó ve vená losima ali agizakú vizemó

¹ Numuni lositá akiake, Kana numutó Galilaia mikasiuka nene ve vená losima ali agizakú vizinigi nosánetá ali vavá niago, Izesuni izolaho áminaló noigo,

² Izesú ezagi izegipala zuhagi alesa milikimikago, viki makó miniki nosánetá ninago,

* **1:51:** Apí 28:12

³ áminagú mina vegenalite vain nagamíma ni asú ikago, Izesuni izolaho nene vain nagamíma mota ni asú ikave loko lo amimó.

⁴ Loko lokago, Izesú láa loko lo amimó: Vená geza nenemú nanamú nenitoka nolane. Nene není netáma neve. Neza alévolé netá loló ito game-naváne velesá alitonamive.

⁵ Loko lokago, izolaho nene gelekelé izegipalama nene netá makokumú lo nolikimikoma ilo, loko lo kimimó.

⁶ Itó Zuta vegenalite litá litá iki kugupe nogokalavó iaká amó nenazo, ámina numukú nene nagamí goni sipisi gehanitunú lilí amó nene 6-ía minamó. Ámina goni napa hamopamó vaí itikumú nene somo ligizani luga luga asú igo ihiki lekiaká amó neve.

⁷ Lá okago, Izesú eza gelekelé izegipala nene lekeza nagamí ihiki nagamí goni napamagú lekilo. Loko lo kemekago, keza nagamí ihimi leki leki ago ago, goni napama nene vaí oake agepagó minamó.

⁸ Lá ikago, Izesú nene lekeza lugáa ihiki aliki viki nosánetá gizapa vema amilo. Loko lokago, keza ihiki aliki nivago,

⁹ ámina ha nagamilímo vain nagamí loló okago, nosá gizapa vemámo no gilimó nene laga imóza, hikutí utó itímini mogona gele vevesamimó. Gelekelé izegipama kezáikó gili hee hee lámó. Lá igo nosá gizapa vemámo vená alimi ame vema sele loake,

¹⁰ láa loko lo amimó: Ve mukitoka nene vain nagamí lagaváa nene goí iki kimikago, niki niki kigikauka gopa okago, alika nene vain nagamí

golesáa nene ihiki kimiaká niave. Nenéminokoma nemóza, géisi nene senisim okanike vain nagamí lamaná imane halá gekanike minanike minanike alika ale utó molokanimó nene vatí sunive, loko lo amimó.

¹¹ Izesú nene Kana numutoka Galilaia mikasigú nene ámina alévolé suni apí ike, ezáa hazana kelepikeago, izegipala zuha keza nene ániagiake, aikumú gili alévolé amó.

Monó zavusave lo hukoketamó

(Mat 21:12-13; Mak 11:15-17; Luk 19:45-46)

¹² * Lá ikago, Izesú nene Kana numutó ahuloake Kapanao apatoka lemeko novigo, izolahove agunala izegipala zuha mukí keza ámegetiki vamó. Viki neneló gamena hána minamake,

¹³ * Zuta vetini avóikini asenini zeketakumú gili mina holisi alitokagove loko, Izesú nene Zelusalega iteko vimó.

¹⁴ Neneló Izesú ániagamó nene monó zavusave hé numunaloka pulumaká iza itó nama luhusi nene Ómasi guguni gizi amitave liki aliki ake, haitó mikasigutí moniló ámina mikasigú moni kimiaká a ve keza moni holomaló gatiká iki niago, ániagoake,

¹⁵ lepa nagá límegeake nakahuni loló oake, vegená niamó sipsip iza pulumaká iza niamó kepeleko kimisele ahula ahula igo, nivago, haitó mikasigutí moniló ámina mikasigú moni kimiaká a vetini holoma aleko gululupa soake gatiki mina moni aleko tulu ahuloake,

* **2:12:** Mat 4:13 * **2:13:** Gá 12:1-27

16 nama luhusi miliaká a vema láa loko lo kimimó: Aménehini numuni imane ali meina numuni lilí amilo. Imane netá hatoka aliki vilo.

17 * Loko Izesú lokago, izegipala zuha leza nene geí numunimule loko mulúne gitihiná imó nenémo nepele hilitimó okave liki monó gotolaú gizikago mína gakó goha gulunimó.

18 Lá okago, Zuta vetini monó gizapa vete láa liki li amemó: Geza némini manámini noanimóma éahini gakotó nalene. Haitó suni makó ale utó moloko mogonaka lelepizemane.

19 * Liki likago, konotó aleko láa loko lo kimimó: Lekeza monó zavusave imane tele vizikiko, nénisi nene gamena losive makole oko noviko, ge lutiginogo uve.

20 Loko lo kemekago, keza lamó: Avotege keza monó zavusave imane kilisimasi 46 oko novigo gi lutiginamóma neve. Itó géisi nene gamena losive makolegó noviko ge lutigitove loko nolape.

21 Liki lamóza, Izesú nene ezáa agupémini zavusavegú lo vizike limó.

22 Minoko heleneikutí gamena losive makole minake mómoká oko otekago, izegipala zuha leza ámina netakumú Izesú li gakómagi monó gotolagutí gakó nenegi mota alévolé okago gelekunike, gele alévolé unimó.

Izesú ve mukilitini mogona gelekave

23 Izesú nene avóikini asenini zeketakumú gili mina holisigú nene Zelusaalega noike, ezáa mogona utó itive loko alévolé suni haitopaitolímini loló

* 2:17: Age 69:9 * 2:19: Mat 26:61, 27:40

okago, mukí vegená keza ániagiake, agulizaláa gili alévolé amóza,

²⁴ Izesú ezáa nene mukí vegenalitini mogona áního asú okamó nenazo, keitoka voko ale akisemimó.

²⁵ Eza ve makolímini mogona gilinogo voko vegenatoka loká miká oketosá amimó. Ezáagó vegená kigikagú áního asú oaká imó neve.

3

Izesuko Nikotemoko

¹ Palisaio monó vetini kigivéipo makó minamó, agulizá Nikotemó. Áisi nene Zuta vetini monó gizapa venini makó minamó.

² Ámina ve áisi límugusigú Izesú noitoka vike láa loko lo amimó: Monó gizapa velemaka, leza mogonaka geleaká nune. Géisi monó apí o lemeaká ve gihila minokanike, Ómasilokatí lemenimóma neve. Ve makó nenémo Ómasi aitoka minamiko loló oaká noani suni aleko alévolé netá loló oakaláa nene nomive.

³ Loko lokago, Izesú láa loko lo amimó: Neza lamaná lo gimitoze, gelezo. Makó nenémo okulumakutí gosohá utó amitimó nenémo Ómasímo alévolé oko gizapa olikimiaká apá ánígaminogo ive.

⁴ Loko lokago, Nikotemó láa loko límó: Íi, mota napa okatímo nana oko gosohá utó itive. Nana oko izolahini agatupagú itekiko goha getatikumú lane.

⁵ Loko lokago, Izesú láa loko lo amimó: Neza lamaná lo gimitoze. Makó eza monó nagamí holoko Sikalahulímini agikagú vo holokoko

gosohá utó amitimó nenémo Ómasímo alévolé oko gizapa olikimiaká apakú iteminogo ive.

⁶ Vegenalititokatikó utó itamó nenete vegenalitini kemetamenigi utó inigave. Sikalahulímitokatí utó itamó nenete Sikalahulímini ametamenigi utó inigave.

⁷ Lá onoinazo, lekeza okulumakutí gosohá utó itave loko lumó nene geza gelekako gena amino.

⁸ Hepé nene gopa aleaká noive. Lá noigo hepélímini anó giliaká niamóza, mogonáa hitotí apí oake aleaká noive itó vike hitoka lutegeaká noihe nene gelemave. Itó Sikalahulímitokatí utó ita vegenalitini mogonáa ámináminoko nene neve.

⁹ Loko lokago, Nikotemó nene gakó lanimó nene mogonaló gelemu gakó laninazo, nana oko utó itive.

¹⁰ Loko lokago, Izesú láa loko lo amimó: Géisi nene Isilae vetini gakó apí o kemeaká ve noanimó nenazo, gakó nolumómámini mogona nanamú gele gopa okane.

¹¹ Neza lamaná lo gimitoze, gelezo. Leza nene áinigoko gele nouni netá áminagó lo lekemeaká nounimóza, lekeza nene gakote gili ahuliaká niave.

¹² Neza mikasigú utó oaká noi netakumú lo lekemekugo, gili seketigí amanazo, nenemú okulumakú utó oaká noi netakumú lo likimitomó nene, nanatitotí gili seketigí itave.

¹³ Lekelikutí ve makolímo okulumakú iteko okulumakú noi netá nene keké ánigonamimóma neve. Okulumakutí lumu ve gihila nénisi Ómasilokatí lumumó nenazo, neza okulumakú noi netá nene ánigonoumóma neve.

14* Mosé nene gozapá mikasi gomopalaló gosi-hakitana avevezaha netá loló oake zaló ale otimó nene gosihámate kepele vegenalite áminaló ániigiiki goha lamaná itave loko lá imó nene nenéminiki okulumakutí lumu ve gihila není nene malipo zaló nilími otinigave.

15 Nilími otikiko nene, nenikumú gili alévolé itamoláa keza alévolé kemetamenigi minanigave, loko limó.

16 Ómasímo numutó namató vegená lelikumú milumavate gilimó nene napa napa nego gipala hamokó lehizeletamó nene aikumú gili alévolé ita vegená keza latila amiki alévolé kemetamenigi minanigave loko lá imó neve.

17 Gipala nenémo mikasiuka vegená lihimá kim-itove loko nomive. Kelémo kugutó vizitive loko Ómasímo amiselekago limimó neve.

18 Makó keza Ómasímini gipalamú gili alévolé itamó nene, Ómasímo lihimá kememinogo ive. Makó keza gili alévolé amitamó nenete Ómasímini gipala hamokó aí agulizá gili alemamó nenazo, nenemú Ómasímo mota lihimá kiminogo ive.

19 Lihimá kemeaká nenémini mogonáa lá oko neve: Okulumakutí lapaná nene mikasiuka vegenalitini kovogisaló ale utó okugo, keza nene netá golesa aliki miniaká amó nenazo, keza lapaná nene ahuliake, límugusímini mututoni mini etó amó neve.

20 Makó keza netá golesa aliki minatamó nenete Ómasímini lapaná kemegeza amiiki kezáini miniki aliki amó nenémini mogonáa utó okative liki

* 3:14: Nam 21:9

Ómasímini lapanató isá amave.

²¹ Makó keza netá gihila aliki minatamó nenete Ómasímo hize lé okimikago iki miliki amó nenémini mogonáa utó itive liki lapanalámini avogisaló anigave.

Áisi minomo iteko minatimóza nénisi minomo lemeko minanogo uve

²² Lá iki miniki, Izesú nene izegipala zuha lelémoko Zelusalega ahulokunike, Zutaia mikasiloka voko minuhá. Neneloka makó minunike nagamí holoketoko minuhá.

²³ Ámina zupa nene Zonini nene velesá nagá numukú alími milamago, Zoní nene Salima apá agilikaloka minake, Aeno loko noi numutoka minamó.

²⁴ * Neneló nagamí mukí minokagove loko veg-ená anitikago, monó nagamí holoketoko minuhá.

²⁵ Lá okago, Zuta ve makolímo Zonini izegipala zuhagi nagamí holokimiaká sunimú pelevesava zemó.

²⁶ Lá iake, Zonitoka viki láa liki li amemó: Tisale-maka geza Zota nagamí vola helegaloka noako, gezagi makó minasi ve mogonáa lo utó moloko lo lemeni ve nenémo itína gamena nene vegená nagamí noholoketago, mukí vegená ahuligitiki aitoka vi asú niamole.

²⁷ Liki likago, Zoní láa loko lo kimimó; Ve makó nenémo okulumá amelaho netá matá amemikoma ezáa hagitana alitihe.

²⁸ * Neza gologí oleketative loko lo mololeketa vema minamuve loko lo lukumumóma neve.

* 3:24: Mat 14:3 * 3:28: Zon 1:20

Ámina ve ale goí otoko gapova veletatane loko Ómasímo nimiselekago umóma neve.

²⁹ Vená ániḡi milita ve áisi vená ve loló okoko agoliza noviziko, agivelaho gelekoko alémo vatí oko mulunagú lamaná gilinogo ive. Nenéminoko mukí vegená nene Izesutokagó nivago gelekuke mulúnegú agila guluma itimó nenémo hutilí oko vaí oko minative.

³⁰ Ámina vémini agulizá nene minomo iteko minatimóza, nénisi minomo lemeko minanogo uve.

Okulumakutí limi ve

³¹ Veletokatí limimó áisi livilegeko noive. Makó nene mikasigutí utó amó nenete mikasímini mututoni lilí inigave. Lá iki mikasigutí gakó lini-gave. Itó okulumakutí limi ve nenémo livilege asú onoive.

³² Áisi nene netá matá geleko ániga netakumú loaká noimóza, aí gakó giliake amegesaló mila vegená mukí niamave.

³³ Gakoláa gili alitamó keza Ómasímo lokago alévolé oaká noi veve liki nene gakó hize lé iaká niave.

³⁴ Ómasímo amiselekago limi ve áisi nene Ómasímini Sikalahula gúe vaí omiake Ómasímini gakokó loaká noive.

³⁵* Amelaho eza gipala ánigo amu heleake, mukí netá nene gipalámini agizakú molo asú okave.

³⁶ Makó nenete Ómasímini gipalamú gili alévolé itamó keza alévolé kemetameni mota alikave. Itó makó keza gipalámini gakó gili ahuliiki mi-hina itamó keza alévolé kemetameni alevinigave.

* 3:35: Mat 11:27

Nenémíni amupiló Ómasímini mesaha ititokó minanigave, loko limó.

4

Izesuko Samalia venako

¹ Palisaio ve keza Izesukumú láa liki gelemó: Zoní nene vegenala zuha luguhakó kelémo moloko monó nagamí holokimiaká noimóza, Izesú nene vegená mukí kelémo moloake holokimiaká noive.

² Nene gakó nene hanuva lámó. Izesú nene izegipala zuha lo lemekago lezategó monó nagamí holoketunimó. Lá okago, Izesú nene gakó geleake,

³ Zutaia mikasi nene ahuloake, Galilaia mikasigú goha vimó.

⁴ Novike nene, Samalia mikasiuka vo anitimó.

⁵ * Samalia mikasigú apá makó agulizá Sika loko neneloka anitimó. Ámina apá nene ká emane amunaló Zakopó eza mikasi makó nene gipala Zoseheni amimómámini agilikaloka minamó.

⁶ Lá okago, áminaló nene Zakoponi nagamí gale minokago, Izesú nene áminaloka holínaka vo aniteake, gapo vike vitímo agizamuha zekago, ámina nagamí galeló minamó.

⁷⁻⁸ Noigo, aí izegipala zuha leza nosánetá meina hizinogo numutoka itekuko, Izesú ezáagó noitoka Samalia vená makó nagamí ihitove loko amó. Oko anitekago, Izesú nene nagamíma ihe nemezo loko lokago,

⁹ * Zuta vegi itó Samalia vegi nene otopá ziki miniaká amó nenazo, ámina vená nenémo geza

* **4:5:** Apí 33:19; Zos 24:32

* **4:9:** Eze 4:1-5; Nía 4:1-2

Zuta ve neneka nanamú Samalia vená nenitoka nagamikumú voká nolane.

¹⁰ Loko lokago, Izesú láa loko lo amimó: Geza Ómasímo gimiti netalímini mogona gelemané. Itó nagamí ihe nemezo loko nolu ve není mogona gelemané. Geza není mogona geletilina, itó alévolé oko mino-loko voakalímini nagamikumú loká atilina, gumuline.

¹¹ Loko lokago, vená nenémo láa loko limó: Ve lamanámaka, gale hána nenazo, itó geí nagamí iheaká netá nominazo, alévolé oko mino-loko voakalímini nagamí hikutí iheko nimitane.

¹² Avoteho Zakopó eza nagamí gale imane ligimó nenazo, ezáagi gipalagi iza galavagi keza áminagutikó niaká amó. Itó géisi nene Zakoponi avilegeko nagamí makó haitolímini ale utó inogo nolape.

¹³ Loko lokago, Izesú láa loko lo amimó: Nagamí imane natamóza, goha nagamikumú likivisinogo ive.

¹⁴ Není nagamí nene lakagatupa oaká nagamí neve. Makó keza nenitokatí nagamí natamó nene, goha nagamikumú kiviseminogo ive. Nénisi nene nagamí kemekugo nene kigikagú agómula minati nagamí minokiko alévolé kemetamenigi minimi itiki minanigave.

¹⁵ Loko lokago, vená nenémo ha nagamikumú nolihe loko láa loko lo amimó: Ve lamanámaka, geza ámina nagamí nemekako, nokinake nagamikumú goha nivisemiko, imaneloka gamena gamena oko nagamí iheva iheva oaká noumó nene ahulokinake navasú vizeko minatoha.

¹⁶ Loko lokago, Izesú ezáa mogonamú gele hee litive loko láa loko lo amimó: Voko vaka nene alémoko ano.

¹⁷ Loko lokago, vená nenémo váne nomimó nena. Loko lokago, Izesú láa loko limó: Geza váne nomive loko lamaná lokanimóza,

¹⁸ géisi nene veló vanimó nene ligizani lugaloka asú igo vokanike animóma neve. Itó itínasa vonani ve nene geí vaka nomive. Nenemú geza soza lamane.

¹⁹ Loko lokago, vená nenémo láa loko limó: Ve lamanámaka, itínasa mota gelekuve. Geza Ómasímini agepagutí gakó loaká ve noane.

²⁰ Leza Samalia vegenalitini avotege nene imaneló Gelizim agokaló Ómasi geké limiaká amó. Itó Zuta ve lekeza Zelusalega Ómasi geké lotatune liki liaká niamóma neve.

²¹ Loko lokago, Izesú láa loko limó: Vená geza lo gimitoze, geleko alezo. Gamena makó alitokaze. Nene alitokiko nene, aménehini imane agokalokó negopa, itó Zelusale numutokagó negopa, mukí apatoka gupá zi amiki monola litave.

²² Lekeza gili gopa iki nene gupá zi amiaká niave. Lukugutó vizeaká nene Zuta ve lelitokatí utó itinazo, Zuta ve lélisi gele hee lo nounike Ómasi gupa ze ameaká noune.

²³ Gamena makó alitanogo ive. Itó imane litá oko mota alitokaze. Nenemú vegenala zuha lamaná keza kigikatunú itó gakó gihilatunú aménehini gupá zi aminigave. Améneho nenéminiki gupá zi amita vegenakumú vitagá noive.

²⁴ Ómasi nene sikalahú nenazo, leza Ómasímini

Sikalahulímini zámuzatunú itó gakó gihilatunú gupá ze amitune.

²⁵ Loko lokago, vená nenémo láa loko lo amimó: Gologí oletative loko lo mololeta ve (leza Kilistó ave loaká nouhá ve) utó itive liki likago gele-noumó nenazo, nene mota gelekuve. Eza utó okoko netá matá mukí nene lo utó o asú inogo ive.

²⁶ Loko lokago, Izesú gakó lo nogumu ve nénisi nene noumole, loko lo amimó.

²⁷ Loko noligo, izegipala zuha leza okunike, ámina Samalia venaki gakó lasimó nenemú sigaga lomikunike, nanetakumú nolihe itó nanamú gakó lo namihe loko loká otanogo gena livisekago ahulunimó.

²⁸ Lá okago, vená nenémo nagamí goni nene ahuloake, ololu loko taoniloka vike mukí vegená láa loko lo kimimó:

²⁹ Lekeza iki imane ve ánígalo. Ánigonamu ve áisi nene asugunatoka oko moloko umó nene gakó lo utó molo asú onimikave. Lá imó nenazo, eza gologí oletative loko lo mololeta vema noitihe.

³⁰ Loko lokago, numutokatí lemeke Izesú noitoka anitikago,

³¹ izegipala zuha leza gala vizeko monó gizapa velemaka, nosánetá nozo.

³² Loko lokuko, eza láa loko lo limimó: Nosánetá haitolímini nenitoka nemóza lekeza gelemave.

³³ Loko lokago, lezatetoka logele hagele unike makolímo nosánetá makó ale ma amekago lihe.

³⁴ Loko lokuko, eza limó: Nimisilimó eza lititoka molatitoka oko hoza gakó lonetamó nene nalumó nenémo nosánetáne neve.

³⁵ Lekeza ikani losive makole goloko helekiko

nosánetá omolanogo ive liki liaká niamóza, lo likimitoze, gililo. Lokogómula pulusiki aménehini mini nene ánígalo. Nosánetá mota omolamó nenémini iki vegená kígika mota ali vavá iki nimi-nave.

³⁶ Loko lo nolukumu gakó nenémini hozaváa alita ve nenete meinaváa alinigave. Alikiko vegená makolite alévolé kemetameni ali luhanigave. Lá ikiko, kígikagú monó zuha atilí a vegi gihila lege vegi ali apiziiki kogoliza vizinigave.

³⁷ Lá okiko, makolímo zuhá okago, makolímo gihila lege moloaká noive liki liaká nia gakóma alévolé inogo ive.

³⁸ Lekeza ali zuhá amikima gihiláa ligítave loko likimiselekumóma neve. Vegená makolite hoza aliki ali zuhá ikago mota omolokago, lekeza hozanínímini gihila hanuva milikave.

³⁹ Loko lokago, Samalia vená nenémo netá matá oko moloko umóma lo utó molo asú onimikave loko lo kemekago, ámina apakú vegená mukilite Izesukumú gili alévolé amó.

⁴⁰ Lá iake, Izesutoka vi anitiake, makó minatune liki alesá milikago, gamena losítá kezagi makó minamó.

⁴¹ Kezagi minake monó lo kimigo, mukilite gili seketigí amó.

⁴² Lá iake, ámina vená nene láa liki li amemó: Leza ganáma nene géisi avetó okako geleháma neve. Lá unimó nemóza, itínasa nene ezáa agepagutí gakó ligo gelekunike gele alévolé okune. Áisi lamaná numutó namató ve lelí lugutó vizeaká ve noive loko mota gele alévolé okune, liki lamó.

Izesú kiapé makolímini gipala alémo zokamó

⁴³⁻⁴⁴ * Izesú ganá nene Ómasímini agepagutí gakó liaká ve kezáini numuni apáitoka miníikoma nene, ma kilími napa aminigave loko likumú nene Izesú eza kezagi gamena losima minoake, Galilaia mikasiuka vimó.

⁴⁵ * Galilaia mikasiuka vo anitekago, Galilaia vegená keza amunaloka Zelusalega viake avóikini asenini zeketakumú gele minoaká holisigú eza hoza aligo ánígamó nenazo, nenemú Izesuni alími milamó. Lá ikago, Kana numutoka Galilaia mikasigú nene amunaló emane Izesú lokago hanuva nagamilímo vain nagamí loló i numutoka atiginá oko vimó.

⁴⁶ * Voko noigo, Kapanao numutoka kiapé makolímíni gipala avisekago, noigo,

⁴⁷ Izesú eza Zutaia mikasi ahuloko goha atiginá oko Galilaia mikasiuka oko nanítive liki likago, geleake ámina kiapé nene gipala helesakosá oko noigove loko Kapanao numutoka alémoko vitove loko Izesutoka víke negénegeka limó.

⁴⁸ Negénegeka lokago, Izesú nene lekeza lu avevezaha la avevezaha nougo, ániagiake gakóne gili aliaká niahe.

⁴⁹ Loko lokago, ámina vémo limó: Ve lamanámaka, gipáne helekatize, litá oko lomano.

⁵⁰ Loko lokago, Izesú nene geza hanuva vozo. Gipaka mota zokokave. Loko lo amekago, ámina vemámo Izesuni gakó gele aleake, atiginá oko vimó.

⁵¹ Novigo, gó lokago, gelekelé vemate gapoló anitiki gipaka mota zokoake noive.

* **4:43-44:** Mat 13:57 * **4:45:** Zon 2:23 * **4:46:** Zon 2:1-11

⁵² Liki likago, zoka gamenamú loká oketago, keza azozá ho luseteló nego agupegú govisi alike hakalotave.

⁵³ Liki likago, gipámini amelaho nene mogonamú lá oko gilimó: Ámina gamenaló Izesú nimisilike gipaka mota zokokave loko limóma neve. Loko geleake, ezáagi vená izegipalagi Izesukumú gili alévolé amó.

⁵⁴ Izesú nene Zutaia mikasiukatí oko Galilaia mikasiuka atiginá ike lu avevezaha la avevezaha nene igo, losi imó.

5

Nonohulotó ve makó alémo zokamó

¹ Minoko Zuta vetini holisi napa makó alitokago, Izesú nene Zelusalega itimó.

² Neneló sipsip izatini gatetó nene nonohuló makó minamó, agulizaláa Petezata. Agilikaloka gaizopa numuni ligizani lugaloka asú igo minamó.

³ Ámina numukú nene kivisi vegená, kogómulaló ali vegená, kigisaló ali vegená, kigisa kigizani nakeseta vegená mukí aki miniaká amó.

⁴ Lá amó nene Guivahanímini ageló makolímo gamena makó zupa lemeaká noike ámina nagamí ale heipeí oaká itotí ámina nonohulokú ganá limi ve nene avisi netakutí zokoaká imó nenazo, keza nagamíma heipeí itikumú gizapa iki minamó.

⁵ Lá iki minakú nene ve makó agisa genisi i ve izolaho getakutí kilisimasi 38 oko novigo alímiki áminaló ahulikago minamó.

⁶ Noigo, Izesú eza ámina ve áníhoake, gamena hána hána minokave loko geleake, loká otake geza zokatove loko ma gelenape.

⁷ Loko lokago, agisa genisi i vemámo limó: Ve lamanámaka, hí ve noítimo nagamí nonohulóma heipei noiko nagamikú nelémo molokiko zokatove. Liminogo nougo, makolímo litá oko nivilegeake lemeaká noive.

⁸ Loko lokago, Izesú láa loko lo amimó: Geza oteoko avilisaka geheko gapo moloko vozo.

⁹ Loko li agepagi agisa golesa i vemámo agisa pehe lo ahuloake, oteko avilisala geheko gapo moloko vimó.

Ámina hoza nene holisi zupa alimó.

¹⁰* Nenemú Zuta vegenalitini monó gizapa vete ve zokamó nene itína holisimagú nenazo, avilisaka ale nogehenimó nene amosá suni alekane.

¹¹ Liki li amikago, eza láa loko lo kimimó: Nelémo zoka vemámo avilisaka geheko gapo moloko vozo loko loake nimiselekago aleko nouve.

¹² Loko lokago, keza láa loko lo gimi ve agulizá éahoma neve.

¹³ Liki lamóza, Izesú nene mulusi ikú holúikú legesá oko vimó nenazo, alémo zokago mina vemámo agulizaláa gelemimó nenazo,

¹⁴ gelemuve loake, monó zavusavegú iteko noigo, Izesú minoko aí áníhoake láa loko lo amimó: Gugupega mota lamaná okaze. Nenemú alika genavagi netá gizalekatanize, lihimá netá goha alemo.

* **5:10:** Nia 13:19; Zel 17:21

¹⁵ Loko lokago, ámina ve eza Izesuni ángo hee loake, vike Zuta gizapa vema ángoake nelémo zoka vémini agulizá Izesúma neve, loko lo kimimó.

¹⁶ Holisigú holisigú hoza nenémináa aleaká ikumú nene Zuta vegenalitini monó gizapa vete nenelotí apí iki gopoguni militake lovaga li amemó.

¹⁷ Lá ikago, Izesú láa loko lo kimimó: Améneho hoza aleaká noimó nene holisi gamenagi miní ameko aleaká noive. Itó nezagi áminagó oko aleaká nouve.

¹⁸ Loko lokago, Izesú nene Zuta vetini holisi ale gopa ikumú, itó Ómasimú nene aménehove like Ómasigi nezagi lelegí oko nousive loko likumú nene Zuta vetini monó gizapa vemate ámina netá lositakumú nene gili golesa goha ake, apele hilitune liki amuza golesa miliaká amó neve.

*Ómasímini gipalámo lihimamú lo hukoketanogo
ive*

¹⁹ Lá okago, Izesú nene gakó láa loko lo kimimó: Neza lamaná lo likimitoze, gililo. Neza Ómasímini gipala noumóza, nezáne nagata geleko hoza alit-omoláa nomive. Améneho alimó nene ángouke áminagó oko aleaká nouve. Améneho oko moloko noimó nene gipala neza ángouke, áminagó oko oko moloko oaká nouve.

²⁰ Améneho nene gipala neni ángo amu heleaká noike, hoza nalimó nene nelepize asú oaká noive. Itó lekeza hoza nalugo ángiaká niamó nenegó nomive. Lekeza ángiiki sigaga linitatave loko améneho eza hoza napa lekelepizitove loko neve.

²¹ Améneho eza hele vegená kelémo oti ke kelémo lamaná oaká noimó ámináminoko gipala neza aipe aipe kemetameni gosohá kimitove loko hanuva kiminogo uve.

²² Améneho eza vegenalitini lihimamú lo hukoketosá amive. Ámina hoza mukí nene gipala není nigizakú molokamó nene

²³ vegená mukilite aménehini agulizá ali otiaká niamó nenémini iki gipala není nugulizá ali otitave loko neve. Makó keza gipala není nugulizá ali otema vegenalite gipala nimisilimó aménehini agulizá ali otemamó geleaká noive.

²⁴ Neza lamaná lo likimitoze, gililo. Makolímohe makolímohe není gakó gelekoko nimisili vemú gele alévolé onoimó nenémo alévolé ametameni mota alekave. Alike lihimalamú goha goní aminogo ive. Heleaká ametameni nene ahuloake alévolé ametameni mota aleake noive.

Izesuni mogonala li utó a ve

²⁵ Neza lamaná lo likimitoze, gililo. Gamena makó alitanogo ive. Itó imane litá oko mota alitokave. Neneloka helemó nenete Ómasímini gipala není nonó lupa giliiki otiiki minanigave.

²⁶ Améneho eza alévolé oakalímini mogonáa neve. Gipala neza áminagó oko alévolé oakalímini mogonáa minatane loko nimisilimó.

²⁷ Lá okago, neza okulumakutí lumu ve gihila nounazo, améneho nene mukí vegenalitini lihimáinimú lo hukoketatane loko lonetamóma neve.

²⁸ Imane nolu gakó giliiki nene ininá amilo. Gamena makó molamó nene hanuva neze. Nene

alitokiko, gonosi apakú akinamó keza nonó lupa giliiki,

²⁹* galegutí otinigave. Lá iiki netá lamaná aliki minamoláa keza alévolé kemetamenigi otinigave. Itó netá golesa aliki minamoláa keza otikiko, li-hima kiminogo uve.

³⁰ Lá itomóza, nezáne nagata geleko hoza al-itomoláa nomive. Améneho lokiko nene, lihi-mamú lo hukoketanogo uve. Lá inake, lihimamú hoza alekugo, etanogo ive. Ámina hoza alitomóza, nezáne nagata geleko alemoko nimisilimó áisi liti-toka molatitoka oko alinogo uve.

³¹ Nezáne mogonáne lo utó itomó nene, gihila zemitinazo,

³² makolímo mogonáne lo utó okiko gihila zinogo ive loko nene gelenouve.

³³* Lekeza Zonitoka ve makó kimisilikago, keza loká imikago, eza gakó gihila lo utó onoimóma neve.

³⁴ Vegená neneta mogonáne ániigiiki hizi lé initatave loko lamuve. Hanuva giliiki alévolé lekemetameni aliiki alévolé gapogú vitave loko lekelikumú nene noluve.

³⁵ Zoní eza lamaná liví napa loló oake, hize hanatoleketonoigo, lokogoliza viziki minamó neve.

³⁶ Ómasímo není hize lé onimiaká noimó nene Zonini avilegeko haitolíminoko neve. Améneho haitopaitó hoza alitane loko hoza gakó lonetamó nene ámina hozámini gihila ale utó okugo, améneho nimiselekago lumumómámini mogonáa utó oaká noive.

* 5:29: Tan 12:2 * 5:33: Zon 1:19-27, 3:27-30

³⁷ * Améneho nimisilimó áisi mogonáne lo utó oaká noimóza, lekelisi nene aí anó lupa gilisá amamóma neve, itó aí ánigisá amamóma neve.

³⁸ Lekeza améneho nimisili vemú gili alévolé amanazo, aí gakó nene likigikagú minamive.

³⁹ Lekeza nene monó gotola mota alenoune liake, alévolé oko minoakalímini gakoláa nenegú neve liki giliake, agizaka hiziki miniaká niave. Itó není mogona nene ámina luhuvagú utó noimóza,

⁴⁰ lekelisi nene nenitoka iki gímiziiki alévolé lekemetamenigi itanazo, gopa ahulinimiaká niave.

⁴¹ Itó vegenalita nugupe aliki ititave loko losá amumóza,

⁴² lekelí mogonáa nene lamaná gelenouve. Likigika nene Ómasiloka milisá amave.

⁴³ Nénisi nene aménehini gakotó moloko lekelitoka lumumopa, lekelisi nene geha zi nimisá amave. Minoko ve makó ezáa agata geleko antekikoma nene, geha zi aminigave.

⁴⁴ Lekeza nene vegenalite lilími napa itave liki giliake, Ómasi hamokolímo lelémo napa itive liki makó lisá amave. Lá ikanazo, nana iiki Ómasimú gili alévolé itave.

⁴⁵ Lekeza nenikumú nene Ómasi amelahini avogisaló goní oletatimó nehe liki lamilo. Lá oko nomive. Lekelisi nene Moseni gakotoka leheta iaká niave. Ámina ve Moseni gakó nenémo goní oleketanogo ive.

⁴⁶ Áisi nene luhuva gizamó nene nenikumú gizonimóma neve. Nenemú lekeza aí gakó gili

* 5:37: Mat 3:17

alemó nelina nezamuki gili alévolé aline.

⁴⁷ Lá onoimóza, Moseni luhuva gakó gili ahulikamó nenazo, není gakó nene nana iki gili guni itamó neve, loko lo kimimó.

6

*Ve 5000 nosánetá kemeko namó
(Mat 14:13-21; Mak 6:30-44; Luk 9:10-17)*

¹ Izesú eza ámina gakó lo asú oake, Galilaia nonohuló agulizá makó Tipelia loko noi nonohuló likeko vo helega imó.

² Voake kivisi vegená mukí kelémo zoka zoka ike, lu avevezaha la avevezaha igo, vegenalite ániagiake, ámegetiki viki minamó.

³ Lá niago, Izesú nene izegipala zuha lelémoko agokaú iteko minunimó.

⁴ Gamena nene zupa Zuta vetini avóikini asenini zeketakumú gili mina holisi alitokago,

⁵ Izesú nene vegená mukí aitoka nanitego, ánikogoake, Piliponi nene loká otake nosánetá hikutí meina hizeko kimitune. Láa vegená alegesá amó imanete niko vo holoma itimó neve.

⁶ Loko limó nene Izesú eza netá matá oko moloko itimó nene nego, hanuva gimivagú moloko limó.

⁷ Lokago, Pilipó nene moni gó ligizani lugaloka asú igo ahuloko nosánetá meina hizeko kimitunimóza, ma vo alemnogo ive.

⁸ Loko lokago, izegipala zuha lelitokatí makó Saimon Pitani agunala Etulú áisi nene láa loko limó:

⁹ Imaneuka izegipa makó noimó áisi peleti ligizani lugaloka asú igo itó lagaha lositá

aleneimóza, vegená mukí nianazo, ánenéatunú nana itune.

¹⁰ Loko loká okago, Izesú nene lekeza vegenáma li kimikiko mikasiló mini gesá iki minino loko lo limimó. Ámina apató nene tau lamaná minamó nenazo, neneló ve 5 tausen ale alitoko nenéminiki limiki mini gesá ikago,

¹¹ Izesú nene ámina peleti aleake, Ómasi agepoka loake, alegesá iki mina vegená gona moloko ke-meake, ámina oko lagahama kimimó.

¹² Kemekago, niki niki kagatupa okago, Izesú nene izegipala zuha lo limike lumatamáa minoko latila okatize, gizaká ilo.

¹³ Loko lokago, leza peleti ligizani lugaloka asú igo kemekuko namó nenémini lumatamáa ale nupa oko gosúveha 12 vaí okago ale mulunimó.

¹⁴ Lá okago, golivagi alévolé netá lá oko loló igo, vegená keza ániagiake, imane lamaná Ómasímini agepagutí gakó loaká ve napa makó mikasigú utó itive liki lina vema noitive.

¹⁵ Liki liake, Izesuni hizi vigiake, agulizaki venini lilí itanigi ago, áni foko geleake, ahulokimi-ake ezágó agoka makotoka itimó.

*Izesú nagamí amupiló liso liso vimó
(Mat 14:22-33; Mak 6:45-52)*

¹⁶ Iteko noigo, únaká molokago, izegipala zuha leza nonohuló agilikaloka lemehá.

¹⁷ Lemeko Kapanao numutoka atiginá oko vinogo nagamikú lapegú noituko, límugusi litihokago, Izesú velesá amigo, lezategó vunimó.

¹⁸ Novuko, ohuhú napa alike, nagamíma valahuká napa nozigo, vunimó.

¹⁹ Leza nene kilomita 5-ahe itó 6-ahe ahulokunike novuko, Izesú nene nonohuló amupiló liso liso vike lugupeló naligo, ánikokunike, lehelele vizimó.

²⁰ Lehelele novizigo, Izesú nene lekelegesá legemino. Nénisima nouze.

²¹ Loko lokago, sipigú alémo molanogo nouko, áminasító vitune loko luni apatoka nene vo anitunimó.

Vegenalite Izesukumú vitagá amó

²² Akunike gó lago, vegená mukí nonohuló vola helega minamoláa keza láa liki lamó: Holugú sipi hamokó imaneló nego ánikunimó. Nenegú izegipala zuha kezáikó Izesuni ahuliake vikamó nenazo, Izesú hitoka vonoítive.

²³ Liki kagata gululusi giliake niago, Tipelia apatokatí vegená makó nene sipi makokú itiake Guivahanímo Ómasi agepoka loake peleti kemekago namómaló imi anitemó.

²⁴ Anítiake, mukí vegenalite Izesuge izegipala zuha niamago, vitagá iake, ámina sipigú itiake, Izesukumú vitagá itune liki Kapanao numutoka atiginá iki vamó.

Izesú alévolé oko minoakalímini nosánetá noive

²⁵ Nonohuló imane helegaloka vitagá iki iki alími utó miliake Monó gizapa velemaka, geza nana oko ane.

²⁶ Liki likago, Izesú láa loko lo kimimó: Neza lamaná lo likimitoze, gililo. Lekeza lu avevezaha la avevezaha ugo ániagiake, nenikumú vitagá niahe. Lá oko nomive. Peleti lukumugo, niki niki lakagatupa okago vitagá niave.

²⁷ Lekeza hozaváa alilo. Haha iti nosá nene-mukopa, alévolé oko minoaká nosánetá nenémini hozaváa alilo. Okulumakutí lumu ve gihila neza Ómasi aménehini anosa alenou ve neza alévolé oko minoakalímini nosánetá lamaná likiminogo uve.

²⁸ Loko lokago anotó aliki Ómasímo giliko lamaná itive loko nana hoza alitune.

²⁹ Liki loká ikago, láa loko lo kimimó: Ómasímo hoza alitave loko loleketonoimóma nene nimisili ve nenikumú gili alévolé itave lokoma nena.

³⁰ Loko lokago, láa liki li amemó: Alévolé suni makó ale utó okako, áinigokinake, geikumú gele guni itune. Nana hoza makó alitane.

³¹ * Avotege keza gozapá mikasi gomopalaló minamómalo nene mana nosakó niki minamóma neve. Nenémini luhuva gakó nene Okulumakutí nosá kimigo niki minamó neve liki gizinamóma neve.

³² Liki likago, Izesú láa loko lo kimimó: Lamaná lo likimitoze, gililo. Mosé nene okulumakutí nosá lekememimóma neve. Améneho nene likimimó. Itó okulumakutí nosá gihila lekemeaká noive.

³³ Nosánetá nene okulumakutí mikasigú limimó nenémo alévolé oko minoaká nene ale utó oleke-meaká noive. Nenémo nene Ómasilokatí nosánetá gihila neve.

³⁴ Loko lokago, Guivahani geza nosánetakumú lanimó nene gamena gamena limitanize.

³⁵ Liki li amikago, Izesú láa loko lo kimimó: Alévolé oko minoakalímini nosánetá nénisi nene nouve. Makó keza nenitoka iki gímizitamó nene gaúna heleminigave. Itó nenikumú gili alévolé itamó keza nagamikumú kivismenogo ive.

* **6:31:** Gá 16:4,15; Age 78:24

³⁶ Neza nene lo lekemeaká noumóza, lekeza nene gili ahuliake, gili alévolé amave.

³⁷ Mikasiuka vegená nene améneho nemeaká noi vegená keza mukí nene nenitoka anitinigave. Nenitoka anitita vegená nene ma kehelú aminogo uve.

³⁸ Okulumakutí lumumó není negepagú gakó hize lé itove loko lememuve. Nimisili vémo lititoka molatitoka oko hoza alitove loko lumumóma neve.

³⁹ Améneho nene nenitoka kelémo mola vegená latila ikatave loko kelémo nupa okinake gamena napaló avasavagi kelémo otekugo, otinigave. Nimisili vémini agepagutí gakó lá oko neve.

⁴⁰ Gipala ánihi hee li miniki aikumú gili alévolé itamó keza alévolé kemetameni alikiko, gamena napaló kelémo ote asú inogo uve. Aménehini gakó nenéminoko neve.

⁴¹ Loko Izesú nene okulumakutí nosánetá nénisi nouve loko likumú nene Zuta vetini monó gizapa vete gili golesa iake géneka lake, Izesukumú láa liki lamó:

⁴² Imane ve nene Zoseheni gipalama neve. Itó izolahiko amelahiko nene ánihi nouháma nenazo, neza okulumakutí lumumóma neve loko nanamú loaká noive.

⁴³ Liki likago, Izesú láa loko lo kimike limó: Lekeza gilikiko golesa amino.

⁴⁴ Ve makó nene kezáini kigikatunú giliiki nenitoka iki gímizeminigave. Améneho nimisilimó eza kelémoko okiko, iki anitinigave. Lá okiko, neza nene vegená nenémináa gamena napaló kelémo otinogo uve.

⁴⁵ * Ómasímini agepagutí gakó liaká a vete gakó

* 6:45: Isa 54:13

láa liki luhuva gizinamáma neve:

Ómasi ezáa vegená mukí nene monó lo kemeko apí okiminogo ive.

Liki gizinamá nenazo, améneho monó lo kimiko gilitamá keza nenitoka anitinigave.

⁴⁶ Ve makolímohe makolímohe aménehini ángosá amimóma neve. Ómasilokatí lumumó nénisi hamokó nounazo, nezagó ángonouve.

⁴⁷ Neza lamaná lo likimitoze, gililo. Nenikumú gili alévolé ina vegená kéisi nene alévolé kemetameni mota alikave.

⁴⁸ Alévolé oko minoakalímini nosá nénisi nene nouve.

⁴⁹ Avotike keza mikasi gomopalaló mana nosakó niliki nivake alika helemó.

⁵⁰ Itó okulumakutí nosá nokoko helemoakalímini imane nenitoka nene neve.

⁵¹ Alévolé nosá okulumakutí limimó nene nénisi nene nouve. Nenemú makó keza nenitokatí nosánetá natamó nene, alévolé iki mini lúaló miliki viki minanigave. Mémelánémo nene nosánetá loló onoive. Numutó namató vegená lekeza alévolé lekemetamenigi minatave loko likiminogo uve.

⁵² Loko lokago, Zuta ve keza pelevesava zeke áisi nana okoko mémeláa limiko natunikumú live.

⁵³ Liki likago, Izesú ezáa zohota zaló hilitimó nenémini gihila ali lá itakumú anoza gakó láa loko lo kimimó: Neza lamaná lo nolukumuve. Lekeza okulumakutí lumu ve gihila není mémelagi golanigi namitamó nene, alévolé lekemetameni alevinigave.

⁵⁴ Makó keza není mémelagi golanigi natamó nene, alévolé kemetameni mota alikago gamena napaló kelémo otinogo uve.

⁵⁵ Není mémela nenémo nosá gihila neve. Itó není golani nenémo nagamí gihila neve.

⁵⁶ Není mémelagi golanigi ninamó nenete neniki ali akisikave. Neza ámina oko keí ale akisekuve.

⁵⁷ Améneho alévolé vémo nimiselekago, lemeku-mole loko aí gelegele nominuve. Ámina iki není mémeláne nata vegenalite není gelegele minanigave.

⁵⁸ Okulumakutí limi nosalímini mogonáa lá oko neve. Avotike gozapá namómáminoko nomive. Kéisi mana nosánetakó niliki vake alika helemóma neve. Itó není nosá imane natamó nenete mini lúaló miliki alévolé kemetamenigi minanigave.

⁵⁹ Loko Izesú eza Kapanao numutoka minake monó numukú itike, ámina monó nene lo kimi gakó neve.

Alévolé oko minoaká gakó

⁶⁰ Lá okago, aí vegenala zuha keikutí mukilite ámina gakó nene giliake, kezáitoka nene gakó imane gelehá nene gena okanazo, nene éaho gele hee loko amegesa molative. Liki goseleka likago,

⁶¹ Izesú nene agikatunú geleake, láa loko limó: Gakó nene gilikago golesa okahe.

⁶² Okulumakutí lumu ve gihila neza goí oko minu apató atiginá oko noitugo, lekeza ánigatamó nene, nana itamó neve.

⁶³ Lugupémini mémela nenémo alévolé lemetameni ale utó oakaláa nomive. Alévolé lemetameni loló oaká nene Sikalahulímini hoza neve. Itó gakó lo nolukumumó nenémo alévolé lekemetameni ale utó oaká gakó neve.

⁶⁴ Láa loko lo lukumumóza, lekelikutí lugáa nenete gili alévolé amave, loko limó. Izesú nene

monola gili ahulata vegenala nene hozava apí i zupa mota geleneimó neve. Itó amimika lití ve ámina oko geleneimóma neve.

⁶⁵ Nenemú ámina gakó lo kemeake, miní ameko láa loko lo kimimó: Neza nenemú láa loko lo nolukumuze, gililo: Makolímo améneho alémo vávani amiko nenitoka omo aniteakaláa nomive.

⁶⁶ Loko lokago, ámina zupa nene vegenala zuha mukilite ezagi minanigi goselé kepelekago, kemegea amiake vikago,

⁶⁷ Izesú nene izegipala zuha 12-ama loká oletake lekezagi ámina iki ahulinimiiki vitune liki nilahe.

⁶⁸ * Loko lokago, Saimon Pitá láa loko lo amimó: Guivahani geza ahulogimikinake éahitoka vitune. Geza hamokó alévolé oko minoaká gakó loaká noane.

⁶⁹ Leza nene geikumú mota gele alévolé onoune. Geza Ómasilokatí apazá keké vizeko noani ve noane loko gelenoune.

⁷⁰ Loko lokago, Izesú láa loko lo kimimó: Neza izegipa 12-a lekelémo etó okumóza, lekelitokatí makó nenémo Satatoka mino molokave.

⁷¹ Loko limó nene Kaliotó numutotí Saimoni gipala Zutá eza Izesuni vegenala zuha 12 lelikutí vémo minoko amimika litikumú limó neve.

7

Izesuni agunamotamolate gili alévolé amamó

¹ Lá okago, Zelusalegatí Zuta vegenalitini monó gizapa ve keza Izesuni apele ahulatune liki amuza

* **6:68:** Mat 16:16; Mak 8:29; Luk 9:20

milikago, Zutaia mikasi nene ahuloake Galilaia mikasigukó vogá ogá oko minamó.

²* Lá oko noigo, avóike minumuni gekumú gili mina holisi alitokago,

³ Izesuni agunamotamolate láa liki li amemó: Vegenaka zuha keza lu avevezaha la avevezaha oaká noanimó nene ánígatave loko imane apá ahulokoko voko Zutaia mikasiloka loló okako ánígatave.

⁴ Makó nenémo omo utó itove lokoma asuguná minoko hozaváa ma alesá amive. Geza hoza nenémináa alitove lokoma, voko vegená kovogisaló utó okoko aliko ánígatanazo,

⁵ liki izegipa agunamotamola keza lámó nene, aikumú gili alévolé amake láa liki likago,

⁶ Izesú nene láa loko lo kimimó: Lekeza netá matá loló itune liki litá iki lilí itamóza, Zutaia apató vito gamenaváne velesá alitamive.

⁷ Monó gelema vegenalite mukahá lekepelemi-nigave. Neza nene miniki aliki ago golesa imoláa lo utó oaká nou netató gasó nimiaká niave.

⁸ Lekeza nene holisigú vilo. Neza nene gamenáne alitaminazo, itínasa ma tovaminogo uve.

⁹ Loko loake, Galilaia mikasiuka minamó.

Izesú minumuni holisi minamó

¹⁰ Minokago, agunamotamolate goí iki holisi minatune liki Zelusalega tivikago, ezagó nene alika olío hizeko tovo imó.

¹¹ Notovo igo, holisi nene alitokago, Zuta ve keza aikumú lokatoká iki hiláauka voko noitive liki vitagá amó.

* 7:2: Liv 23:34; Gapo 16:13

¹² Lá iki mihina iki vitagá niago, mukí vege-nalite aikumú musímusika liki nilake lugáate Izesú nene ve lamanáma neve liki likago, lugáate géneka liake ahulalo, áisi nene vegená kelémo gopa napa oaká noive.

¹³ Liki lamóza, Zuta vetini monó gizapa vemú kehelele vizekago, gakó napagutí lamake asugunatoka lamó.

¹⁴ Lá ikago, holisi holulagú Izesú nene monó zagusavegú itike monó apí okimike limó.

¹⁵ Lá oko noigo, Zuta ve keza sigaga lake áisi nene lelí sukulu lamimóma nemóza, monó mogona hiláaukatí geleaká imó nolive.

¹⁶ Liki likago, Izesú láa loko lo kimimó: Neza monó apí olikimiaká noumó nene nezáne geleko lo lekemesá amuve. Nimisili vémitokatí geleko lo lekemeaká nouve.

¹⁷ Makó nenete Ómasímo lititoka molatitoka oko alitune liki gilitamó nene, alika Ómasilokatí nehe nenitokatí nehe nene ámina monokumú gili hee linigave.

¹⁸ Makó nenete kezáini kagata gilitató litamó nene kugupe aliki itiki linigave. Makó nenete kimisili ve hoza amelahikumukó agupe aleko ititune liki hozava alita ve nenete ve huluva, sozagi nomi vegená niave loko litune.

¹⁹ Lekelikutí Mosé eza lo hukoko lo likimi gakó amegesa mila vegená ma niamave. Nenemú lekelisi nene nanamú nipilitune liki liaká niave.

²⁰ Loko lokago, vegená mukilite lamó: Geza matuka gopa okago nolape. Éaho gipilitove noligo nolane.

²¹ Liki likago, Izesú láa loko lo kimimó: Neza

holisi zupa avevezaha hamokó loló umó nene ániagiake sigaga linamó neve.

²² * Nenemú gililo. Mosé nene izegipatini kugupeló Ómasímini anosa milikitatave loko loleketamó nene, Mosé apí amimó. Avotike kezáini apí amóma neve. Lá okago, ámina hoza alita gamena alitokago, holisima neve liki lamiki ámina hoza hanuva aliaká niave.

²³ * Nene Mosé lo hukoko li gakó haha okative liki Ómasímini anosa nene izegipatini kugupeló nene holisi gamenaló milikimiaká nianazo, nénisi nene holisi zupa ve gepili alémo lamaná ukumú lekeza nanamú gili golesa iaká niave.

²⁴ Lekeza ániagi lamaná amikima gakó galinali lamilo. Mogonaló gili hee hee likigó lilo.

Ómasímo gologí oletative loko lo mololeta ve

²⁵ Loko lokago, Zelusale apá amelage luguhate láa liki lámó: Apilitune liki liaká nia vema imane nehe.

²⁶ Nana okago gakó utó nolitó imane kugulizaki vele nenete géneka litamave. Keza aí mogonáa giliki gili vevesamó Ómasímo gologí oletative loko lo mololeta vema noigo niahe.

²⁷ Lá oko nomive. Imane vémini getamoláa mota gelenoune. Gologí oletative loko lo mololeta vema utó itimómámini mogona ma gele vevesaminogo une.

²⁸ Liki lámó nene Izesú Nasalete numutoka utó ihe like giliake láa liki likago, Izesú monó zagusavegú nene monó apí oketoko noike gakó

* **7:22:** Liv 12:3; Apí 17:10 * **7:23:** Zon 5:9

napagutí láa loko limó: Íi, lekeza mogonánegi není getamó mogonáagi gelenoune liki linamóza, lumumó nene nezáne nagata geleko lememuve. Lamanalímini amelaho noive. Áisi nimiselekago lumumóza, lekeza aikumú nene gelemave.

²⁹ Nénisi nene aí amatoka minutotí nimiselekago lemekumó nenazo, aí mogona gele vevesonouve.

³⁰ Loko lokago, Ómasilokatí lumumó neve loko likumú nagá aminigi amóza, gamenaváa alitamigove liki kigizató gena okago ahulamó.

³¹ Lá ikago, keitokatí vegená mukilite aikumú gili alévolé iake láa liki lámó: Imane vémo lu avevezaha la avevezaha oaká noinazo, gologí oletative loko lo mololeta vema anitive liki lina vemámo Izesuni aviligithe. Óve, avilegeminogo ive.

Nagá numukú Izesuni alími milatave liki pilisi ve kimiselemó

³² Alegesá iki mina vegenalite láa liki nilago. Palisaio monó vegenalite giliake, keza guguni giziaká a ve napagi ligili hagili iake Izesuni nene nagá numukú alími milatave liki pilisi ve kimiselemó.

³³ Lá ikago, Izesú láa loko limó: Neza gamena koma lekelitoka mininake nimisili veloka atiginá oko vinogo uze.

³⁴ Lá okugo lekeza nenikumú vitagá itamóza, ma áinigaminigave. Voko minatotoka nene nana iki ititave. Ma iteminigave.

³⁵ Loko lokago, Zuta vete kezáitoka láa liki ligili hagili amó: Imane ve hitoka voko noiko vitagá itunikumú live. Zuta vegená Kiliki mikasiuka

hutilí iki viki niamoláa keitoka voko minoko monó gakó apí o kemeko noiko vitagá itunikumú lihe.

³⁶ Lekeza nenikumú vitagá itamóza, ma áinigaminigave loko limó itó voko minatotoka ma iteminigave loko limó nene nana itikumú live, liki lamó.

Ligikagutí nagamí lisani nenéminoko lemeko minanogo ive

³⁷ * Zuta vegenalitini holisi napa nene asú inogo noigo, alegesá napa iki niago, Izesú oake gakó napa like láa loko lo kimimó: Makó keza nagamikumú kivisekikoma, nenitokatí iki natave.

³⁸ * Itó monó gotolaú nenikumú gili alévolé ita vegenakumú nene kigikagutí monó nenémo nagamí lisani nenémini oko zeko minanogo ive liki luhuva gizinamóma neve.

³⁹ Loko Izesú limó nene ezáamú gili alévolé ita vegená nene Sikalahú lehizeketatove loko limó neve. Eza okulumakú gonanalisi lapanalámini agikagú velesá itenamikeve loko Sikalahú velesá lehizeketamike limóma neve.

Vegenalite Izesukumú hizi hoú lamó

⁴⁰ Ámina gakó nene vegenalite giliake, lugáate Izesukumú nene lamaná Ómasímini agepagutí gakó loaká vele gakoláa gelekunike ageva nouhá ve imane noive.

⁴¹ Liki likago, lugáate áisi nene Ómasímo gologí oletative loko lo mololeta vema noive liki likago, lugáate Izesukumú Galilaia mikasiuka utó ihe liki

* 7:37: Liv 23:36 * 7:38: Isa 58:11; Zak 14:8

giliake pelevesava ziki láa liki lamó: Gologí oletati vema nene nana oko Galilaia mikasigutí utó itive.

⁴² * Monó gotolaú nene gologí oletative loko lo mololeta ve eza Tevitini apá gotola Petelehe apakú itó Tevitini agapilamó zuhagutí utó inogo ive liki luhuva gizinamóma neve.

⁴³ Liki liake, aikumú mini luga luga amó.

⁴⁴ Lugáate nagá amitune liki amó nene kigizató gena okago ahulamó.

Monó gizapa vete gili alévolé amamó

⁴⁵ Lá iake, monó zagusaveló pilisi ve minamó keza atiginá iki vikago, guguni giziaká a vegi Palisaio monó vegi keza loká ikitake lekeza nanamú alímiki amave.

⁴⁶ Liki likago, pilisi vete áisi gakó nolimó nenémini iki ve makolite lisá amave.

⁴⁷ Liki likago, Palisaio ve keza láa liki lamó: Lekezagi ámina oko lokogoka vizekago nilahe.

⁴⁸ Monó gizapa ve lugáagi Palisaio ve lugáagi aikumú gelemó alévolé okago nilahe.

⁴⁹ Óve. Imane li huka gakó gelema vegená alegesá iki niamó nene usí vize kemenei vegenakó niave.

⁵⁰ * Liki likago, keikutí ve makó Nikotemó nene amunaló emane límugusigú Izesutoka vi vemámo láa loko lo kimimó:

⁵¹ Lekeza lilo. Ve makó nene mogonáa giliki lihi-mavala ánigamiki apilitune liki liaká niahe. Monó gotolaú lá oko nomive.

⁵² Loko lokago, agivelage gahá amiki láa liki lamó: Gezagi nene ámina oko Galilaia mikasiukatí

* 7:42: Mik 5:2 * 7:50: Zon 3:1-2

numuká ve noape. Monó gotolaú vitagá ova ova oko Galilaia mikasiukatí Ōmasímini agepagutí gakó loaká ve makó utó itive loko keké nomive loko gilitanize. [

⁵³ Liki liake, hutilí iki numúitoka vi vi amó.

8

Moko mogonaló noigo áníga vená

¹ Ikago, Izesú nene Olivi agokaú itimó.

² Akiake gó lokago, ho sikí nologo, monó zagusavegú goha iteko noigo, vegená mukí áisi noitoka alegesá ikago, mitó minake monó apí o kimimó.

³ Lainim-noketago, monó mogona apí ikimiaká a vegi Palisaio monó vegi keza vená makó moko mogonaló noigo ánígiake Izesutoka alímiki viki alími holukú miliake láa liki lamó:

⁴ Tisalemaka, imane vená mokoló noigo ánígokunike alémoko nounimó lae.

⁵ * Itó Mosé eza lo hukoko li gakokú vená nenémináa gehanitunú kipili ahulalo loko loletonoimóma nenazo, géisi nanave loko nogelene.

⁶ Liki lamó nene gakó lo gopa itihe liki gimivagú miliki lamó. Gakó nana oko litihe gelek-inake neneló alémo moloko lokinake goní otatune liki agoka viziki lamó. Likago, Izesú gupá zeake mikasiló nene agizanitunú luhuva gizamó.

⁷ Nogizago, keza loká imiake goha loká itago, oteake láa loko lo kimimó: Lekelitokatí ve makó lihimavala nomiti vémo apí oko gehanitunú apelekiko apililo.

* 8:5: Liv 20:10; Gapo 22:22-24

⁸ Loko loake, goha gupá zeake mikasiló agizani-tunú luhuva makó gizamó.

⁹ Nogizago gakola giliake, améipo ale goí oko vokago, hamopamó viká viká iki vi asú amó. Vikago, ámina venáma Izesuni amatoka noigo,

¹⁰ Izesú okena oko gonú napilike loká otake vená geza gilímiki a vegená hitoka vave. Makolímo lihimakamú goní ogetamihe.

¹¹ Loko lokago, vená nenémo Guivahanínemaka, lá amave. Loko lokago, Izesú limó: Nezagi ámina oko lihimakamú goní ogetamuve. Nenemú voko lihimá netá goha alemo, loko lo amimó.]

Izesú numutó namató vegenalitini liví noive

¹² * Alike Izesú eza vegená nene gakó miní ameko láa loko lo kimimó: Neza mikasiuka vegená lekelí liví nouve. Makó není némegetata vegená keza límugusi gapogú viki minaminigave. Alévolé lapaná aliiki minanigave.

¹³ * Loko lokago, Palisaio monó ve keza láa liki li amemó: Gezaka mogonaka lo utó moloko lanimó nene leza gelekuko gihila nomive.

¹⁴ Liki likago, Izesú láa loko lo kimimó: Nezánéne mogonáne lo utó mulumó nene, neza hitokatí umó itó hitoka vitohe nenémini mogonáa gelenouke, gakó nolumó nene gihiláa neve. Lekelisi nene nemú manamú makó gilisá amave.

¹⁵ Lekeza ha vegenalite lotuva ligiaká niató liaká niave. Neza mogonataganamú lotuva legeko hozaváa itína alemumóza,

* **8:12:** Mat 5:12; Zon 9:5 * **8:13:** Zon 5:31

¹⁶ neza mogonatagana lotuva legeko alulina nene nezánegó alitomoláa oko minamiline. Nimisili ve améneho nelémo vatí oaká noinazo, alitomoláa oko nene lotuva legeko hozaváa alitomó nene gihiláa zinogo ive.

¹⁷ Mosé lo hukoko li gakokutí láa loko nemóma neve: Ve lositalitosa ve makolímini mogona li utó iki litái gakó nene hamó gapoló vokíkoma lasi gakó nene gihiláa neve loko litune.

¹⁸ Nezáne mogonáne nolugo, nimisili ve améneho nene ámina oko lo utó molonimiaká noive.

¹⁹ Loko lokago, keza loká itiki amekaho hí noive liki likago, eza láa loko lo kimimó: Lekeza není mogona gili guni amake aménehinigi mogona gili guni amave. Lekeza není mogona gelelina, aménehini mogonagi ámina iki gili guni aline.

²⁰ Loko Izesú limó nene eza monó zagusavegú moni miliaká a pokisi mina agilikaloka minake, monó lainim-oketoko ámina gakó limóza, game-naváa alitamigo ve makolímo oko nagá numukú alémo molamimó neve.

Nénisi voko minatotoka ma aminigave

²¹ Izesú miní ameko láa loko lo kimimó: Neza ahulolikimikinake vokugo, lekeza vitagá iiki lihi-matinigi ha miniko hilinigave. Lá iki hiliiki nénisi voko minatotoka ma aminigave.

²² Loko lokago, Zuta vetini monó gizapa vete neza voko minatotoka ma aminigave loko limó nene nanamú live. Ezáa agupe ale golesa oko hilinogo lihe.

²³ Liki likago, eza láa loko lo kimimó: Lekelisi nene amunalokatí niave. Nénisi veletokatí nouve.

Lekeza mikasiukatí niamóza, neza mikasiukatí minamuve.

²⁴ Lá onoimó nenazo, neza nenemú lihimatinigi ha miniko hilinigave loko lo lekemekuve. Neza imane minoko mogonáne lo nolukumumóza, lekeza Ómasilokatí lemeni ve noane liki gili alévolé amitamó nene, lihimatinigi ha miniko hilinigave.

²⁵ Loko lokago, loká itiki Olo, éahoma noane. Liki likago, Izesú láa loko lo kimimó: Apí oko mikasiuka lumutotí lo lekeme-loko voaká noumó lae.

²⁶ Neza lekelí lihima gakó mukí alenoumóza, nimisili vémini gakó imane lo utó moloko lo leke-meaká nouve.

²⁷ Loko amelahikumú láa loko lo kemekago, keza gili hee lamamó.

²⁸ Nenemú Izesú miní ameko láa loko lo kimimó: Lekeza okulumakutí lumu ve gihila není nene zaló nilími otiiki, lo lekemeaká noumómámini oko noive liki gili guni inigave. Itó nezáne nagata geleko alemuke, améneho lo nimitokó loaká noive liki gili guni inigave.

²⁹ Nimisili ve eza nezagi makó noive. Neza gamena gamena netá matá oko moloko ukumú amu helekago, ma ahulonetosá amive.

³⁰ Loko lokago, vegená mukilite Ómasilokatí limi ve noive liki aikumú gili alévolé amó.

Gakó gihiláa nenémo gologí oletanogo ive

³¹ Zuta ve gili alévolé iminamoláa nene Izesú láa loko lo kimimó: Lekeza není gakotokó minatamó nene, není izegipáne gihila minanigave.

³² Lá iiki gakó gihiláa gili guni ikiko, ámina gakolímo nagakutí gologí olikimikiko, vatí iki minatave.

³³ * Loko lokago, makolite láa liki li amemó: Leza Avalahani agapilamola nouko makolímo ezáa gopoguna lelémo molosá aminazo, geza gologí olímiakako, vatí oko minatune loko nolape.

³⁴ Liki likago, Izesú láa loko lo kimimó: Neza lamaná lo likimitoze, gililo. Makó keza lihimá netá aliki minatamó nene lihimá netalímini gopogu izegipa minanigave.

³⁵ Gopogunate gizapa véinímini numukú miniki aliki aminigave. Gipalámogó nene amelahini numukú mino lualó moloko minanogo ive.

³⁶ Nenemú Ómasímini gipala áisi gologí olikimikiko, lekeza lamaná nagakutí gologí olikimikiko minanigave.

³⁷ Lekeza Avalahani agapilamola niave loko mota gelenoumóza, gakónémo likigikagú minamigo, nepele hilitune liki liaká niave.

³⁸ Neza aménehini amatoka minuke ánigonou netakumukó loaká nouve. Lekeza nene lekezatini ametipitokatí ánigiki gele netakó lilí iaká niave.

³⁹ Loko lokago, ametehe nene Avalahá noinae. Liki likago Izesú láa loko lo kimimó: Lekeza Avalahani agapilamola minalina, aí avevezahaló iki miliki minaline.

⁴⁰ Ómasilokatí gakó gihiláa gulumó nene lo lekenoumóza, nepele hilitune liki liaká niave. Avalahá nenémini osá amimole.

⁴¹ Lekelisi nene ametipo imó imó nene iaká niave. Loko lokago, leza gapoló izegipa minamune.

* 8:33: Mat 3:9; Luk 3:8

Ómasi nene ameteho hamokóma noive.

⁴² Liki likago, Izesú láa loko lo kimimó: Neza Ómasi minutotí vegená nemetamenigi loló okuke lemenouve. Neza nagata geleko lumumó negopa, Ómasímo nimiselekago noumó nenazo, ametipo nene Ómasi minalina, likigika nenitoka milaline.

⁴³ Není gakó nana okago gili vevesamave. Neza gakó nolugo gena likivisekago gilísá amamó, nen-emú.

⁴⁴ Lekelisi ametipo Satá amu hiliti netá alitune liki giliaká niave. Áisi gozapá nene kepelenó kepelenó oko mino-loko noave. Agikagú gakó gihila nomigo, amegesa ameaká noive. Soza gakolímini amelaho eza soza saza gakó nene nosáneta la loló okago, áminaló gelegelela minoaká noive.

⁴⁵ Nénisi nene gakó gihiláa lo lekemeaká noumóza, lekelisi nene gili ahuliaká niave.

⁴⁶ Lekelitokatí makolímo není lihma ma lo utó okiko alévolé itihe. Neza gakó gihiláa lo lekemeaká noumó nenazo, nanamú gili alísá amave.

⁴⁷ Makó keza Ómasímini gipa minatatite Ómasímini gakó gilinigave. Lekeza Ómasímini izegipala minamake, aí gakó gili ahuliaká niave.

Avalahá utó oko minamigo Izesú minamó nomi-nave

⁴⁸ Loko lokago, monó gizapa ve keza láa liki li amemó: Geza Samalia numuká ve matuka gopa okago nolape loko gelekunike gakó lamaná loaká noune.

⁴⁹ Liki likago, Izesú láa loko lo kimimó: Neza matúne gopa okago lamuve. Aménehini ale napa oko loaká nouve. Lekelisi nene není aliki mumu-sopa ziaaká niave.

⁵⁰ Neza nugulizá vitive loko losá amuve. Nene aménehini hoza neve. Áisi nene gakó lo hukoaká ve nenémo vegenalitini mogonataganáinimú lo hukanogo ive.

⁵¹ Neza gakó lamaná lo likimitoze, gililo. Makó keza není gakó gili alitamó nene kigikáa ma heleminogo ive.

⁵² Loko lokago, Zuta vete láa liki li amemó: Matuka lamaná gopa okave. Avalahá gozapá helekamóma neve. Itó Ómasímini agepagutí gakó liaká a ve keza ámina iki hilikamóza, makó keza není gakó gili alitamó nene kigikáa ma heleminogo ive loko nolape.

⁵³ Avoteho Avalahá iteko mina ve helekamóma neve. Géisi Avalahani aviliginogo nolape. Itó Ómasímini agepagutí gakó liaká a ve keza ámina iki hilikave. Geza hí ve suka loko gugupe aleko noitene.

⁵⁴ Liki likago, Izesú láa loko lo kimimó: Nezáne nugupe aleko ititomó nene etaminogo ive. Améneho Ómasileve liki liaká nia ve áisi nene nelémo napa oaká noive.

⁵⁵ Lekeza aikumú gili vevesisá amave. Nezáne nene aikumú gelenouve. Aikumú gelemuve loko lulina nene, lekelikitana oko sozaló ve minulinamóza, lá oko nomive. Amenehikumú gelenouke gakoláa gele aleaká nouve.

⁵⁶ Avotipo Avalahá neza mikasiuka lumu gamena nene vamotoka ángoake, agoliza vizeko minamóma neve.

⁵⁷ Loko lokago, ámina gizapa ve keza li amiki geí kilisimasi 50-a vaminazo Avalahani ma ángonape.

⁵⁸ Liki likago, Izesú láa loko lo kimimó: Neza

lamaná lo likimitoze, gililo. Avalahá nene utó onamigo, minumó nominuve.

⁵⁹ Loko lokago, gehani aliake apili hilinigi ago, Izesú nene unamaha oake monó zagusavegutí lemeko vimó.

9

Izolaho getakutí agómula lika ve alémo golouto-tamó

¹ Gamena makó zupa nene Izesú eza gapoló novike, ve makó izolahini agatupagutí agómula liko vimó geta ve ánígamó.

² Nánigago, vegenala zuha leza loká otoko monó gizapa velemaka, éahini lihimámo agómula likamó getave. Ezáa lihimámo nehe itó izolahiko amelahiko lihimámo neve.

³ Loko loká omikuko, Izesú láa loko lo limimó: Nenémo amive. Itó izolahiko amelahiko lihimámogi amive. Ómasímini zámua aitoka utó itive loko nenémináa getamó neve.

⁴ Mikasiuka vegená niamó keza holisakasanagó hoza aliake, holugú nene hoza alisá amave. Ámináminoko leza nimisili vémini hoza itína alekinake, lelí hoza asú iti gamena nene hoza aleminogo une.

⁵* Neza mikasigú minato gohala mikasiuka vegenalitini liví minanogo uve.

⁶ Loko loake, mikasiuka gituhú oake, mikasi aleko lukená zeake agómula lika vemámini agómulaló holomiake,

⁷ láa loko nolike amisilimó: Geza voko Siloama nonohulukú golotuvaka nagamí zezo. Ámina

* 9:5: Mat 5:14; Zon 8:12

nagamí agulizalímini mogonáa nene apili mila nagamile. Láa loko lokago, ámina ve vike nagamí zeake, agómula goloutokago, atiginá oko amó.

⁸ Lá okago, agivelage ániagiake, goí oko monimú voká vokató ve minoaká imómave liki giliake, monimú voká vokató mumuzó mumuzó oko minoaká i ve imane nehe.

⁹ Liki likago, lugáate ámina vema nenaie liki likago, lugáate óve, áminagitana haitó noinogo ive. Liki likago, ámina vemámo neza ámina vema nounae.

¹⁰ Loko lokago, loká itiki nana okanike gogómula goloutane.

¹¹ Liki likago, láa loko lo kimimó: Ve makó agulizá Izesú áisi goihá loló oake nogómulaló holonimiake, Siloama nonohulokú voko nagamí zezo loko lo nemekago, neza voko novogisa nagamí zeuke nogómula pulusokave.

¹² Loko lokago, keza loká itake ámina ve hikuka noive liki likago, neza ma ánigamuve loko limó.

Palisaio monó vete agómula goloutamó nenémini mogonamú vitagá amó

¹³ Láa loko lokago, agómula ale goloutota vema nene Palisaio monó vegenatoka alímiki vamó.

¹⁴ Itó Izesú nene goihatunú agómula ale goloutamó nene holisi zupa lá imó.

¹⁵ Lá okago, Palisaio monó ve keza ámina iki agómula goloutakumú goha loká itiki likago, láa loko lo kimimó: Izesú nogómulaló goihá holonimikago, nagamí zekugo, nogómula goloutokamole.

¹⁶ Loko lokago, Palisaio ve lugáate Izesunimú nene lelí holisigú hoza lá oko alike ale golesa

oaká noinazo, ámina ve eza Ómasilokatí noamive. Liki likago, lugáate lamó: Eza ve golesa minalina, golivagi hoza nenémináa nana oko aliline. Liki liake, pelevesava ziki mini luga luga amó.

¹⁷ Lá iake, agómula lika vema loká itiki gogómula ale lamaná i vemú gezaka nanave loko nolane. Liki likago, eza limó: Eza Ómasímini agepagutí gakó loaká ve noitive.

¹⁸ Loko lokago, Zuta vetini monó gizapa ve keza agómula lika ve minamóma agómula goloutokave liki gili seketigí amake, izolahiki amelahiki sele li kimiake,

¹⁹ loká ikitiki gipatini agómula liko minamó getusimole liki nilasihe. Itó ámina gipa imane nehe. Nana oake agómula goloutave.

²⁰ Liki likago, izolahiko amelahiko láa liki lasimó: Gipatema noive loko gelenousive. Itó agómula likamó getusimómave loko gelenousimóza,

²¹ eza nana oake itína agómula goloutahe, itó éaho agómula ale goloutave nene gelemusive. Eza olotiva netá nenazo, ezáa loká itiko lo likimitimole.

²² Liki lasimó nene, Zuta vetini monó gizapa ve keza gozapá amunaló nene ve makolímo Izesukumú nene gologí oletative loko lo mololeta vema noive lokikoma monó mosetatune liki li hukamó nenazo, nenemú izolahiko amelahiko keza Zuta vetini gizapa vemú kelegesá legekago,

²³ olotiva netá nenazo, loká italo liki lasimó.

²⁴ Likasigo, agómula lika vema goha sele li amiake, láa liki li amemó: Geza Ómasímini avogisalo gakó lamaná lamane. Leza ámina vemú nene

lihima netá aleaká ve noive loko gelenounimó nenazo, aí agulizá ale otemo.

²⁵ Liki likago, áisi láa loko lo kimimó: Eza nene lihima netá aleaká ve nehe nene gelenamumóza, netá hámakó gelenouve. Neza goí oko nogómula likamó minumómaha itína nogómulánema áinigokave loko lamaná gelenouve.

²⁶ Loko lokago, goha loká itiki nana ogetave, gogómulaka nana oko ale goloutogetave.

²⁷ Liki likago, láa loko lo kimimó: Mota lo leke-mekumole. Nene gelesmahe. Goha litaha gakó nanamú lugo gilinigi nilave. Lekezagi aí izegipala zuha loló itune liki nilahe.

²⁸ Loko lokago, lekesava amiake lamó: Géisi nene aí izegipala noane. Léisi nene Moseni izegipala noune.

²⁹ Ómasímo nene gakó makó Moseni lo amimó neve loko gelenounimóza, imane ve nene getamoláa nene gelemune.

³⁰ Liki likago, ámina vémo gakó láa loko lo kimimó: Nogómula ale goloutoneta vémini getamoláa gelesmahe. Neza giza lo noleketuve.

³¹ Ómasi eza vegená golesatini gakóini geleko kelémo vatí osá amimóza, makó nenémo Ómasi geké lotoko gakola gele alitimó nene, Ómasímo alémo vatí inogo ive loko geleaká noune.

³² Itó ganá apí oko mikasi utó itotí ká emane ve makolímo agómula likamó getamó agómula ale golouta gakó ma lago gelemuháma neve.

³³ Nenemú imane ve Ómasilokatí lememimó nelina, hoza nenémináa ma alemiline.

³⁴ Loko lokago, láa liki lamó: Golesa gupilizá utó

animó ánenéminaka monó lo lemesaláa noape. Liki liake, ahelú i ahulamó.

Kigikámini agómula lika gakó

³⁵ Izesú nene amisili ahula gakó geleake, koma minake ámina ve ángoake, loká otko geza oku-lumakutí limi ve gihilamú gele alévolé onope.

³⁶ Loko lokago, ámina vémo ve lamanámaka, lani ve nelepizekako, ángo lamaná okinake, aikumú gele alévolé itove.

³⁷ Loko lokago, Izesú nene geza ángonoako gakó lo nogumu ve neza imane noumole.

³⁸ Loko lokago, ámina vémo Guivahanínemaka, neza mota gele alévolé onouve. Loko loake, ag-ihúna geko akamó.

³⁹ Lá okago, Izesú limó: Neza vegenalitini mogonáini ale vevesatove loko mikasiuka lumumó nene kigikámini agómula nomimó nenete pulusiki ángataze, itó ligikámini agómula likamimó neve liki liaká nia vegenalitini kogómula likokiko, ámináa miniliki viki minatave loko neve.

⁴⁰ Loko lokago, Palisaio monó ve minamoláa lugáa keza giliake, loká itiki Olo, ligikámini agómula likamó nouko nolape.

⁴¹ Liki likago Izesú láa loko lo kimimó: Lekeza likigikámini agómula likakumú gatizá minalina, lihimatini minamilinamóza, lekeza nene ligikámini agómula goloutonoive liki liaká nianazo, lihimatini ha minanogo ive, loko limó.

10

Sipsip izatini geisamú anoza gakó

¹ Izesú gakó makó láa loko limó: Neza lamaná lo likimitoze, gililo. Makó eza sipsip izatini geisagú itinogo gatekú itemoko geisa gohalaló itekikoma, gumina vaukaló ve noive loko litune.

² Gatetó ititi vemú nene iza gizapa ve noive loko litune.

³ Áisi nene anitekiko gatetó gizapa ve nenémo gahe segetanogo ive. Itó sipsip izava keza gizapa vémini anó lupamú gilinigave. Nigiliko sipsip izavatini kugulizá oko sele noloko geisa mikutí kelémoko liminogo ive.

⁴ Ezáa mututoni kelémoko lemeko ale goí noigo, anó lupamú gelekune liki ámegetanigave.

⁵ Haitó ve makolímini anó lupamú gelemitamó nenazo, ámegetaminigave. Kelegesá legekiko, golisi inigave.

⁶ Loko Izesú anoza gakó láa loko lo kemekago, keza nanamú lihe liake, gili vevesamamó.

Izesú nene sipsip izatini gizapa ve lamaná noive

⁷ Lá ikago, Izesú eza miní ameko lo kimimó: Lamaná lo likimitoze, gililo. Sipsip izatini geisagú itiaká gateni nénisi nene nouve.

⁸ Nénisi noamugo soza monó liaká ve utó amó mukitó nene gumina vaukaló ve minamó. Nen-emú sipsip iza keza gakóini gili alisá amamó neve.

⁹ Gateni nénisi nene nouve. Makó keza není nivi-legemiki miniki geisagú ititamó keza latila amini-gave. Némegé némegé iki minumuni lamanakú mihina inigave.

¹⁰ Guminaló ve eza voko sipsip iza vauka apeleko aleko vinogogó geisagú iteaká noive. Není sipsip izate alévolé kemetamenigi minumuni

lamanakú mihina iki minatave loko lumumóma neve.

¹¹ Nénisi nene sipsip izatini gizapa ve lamaná nouve. Gizapa ve lamanalímina sipsip izamule loko minoko aleko oakaláa ahulatimó neve.

¹² Gelekelé izegipa nene iza amelaho minamive, itó gizapa lamaná oko amitimó neve. Nenemú hela gala anitekiko, áinigooko sipsip iza ahulokimioko golisi inogo ive. Lá okiko, hela gala nenémo sipsip izama kepeleko kelémo hutilí inogo ive.

¹³ Eza monimukó hoza aleaká noinazo, sipsip izamú makó gelesá amike ahulokimioko golisi voaká noive.

¹⁴ Nénisi nene sipsip izatini gizapa ve lamaná nouve. Aménehiki nezagi áinigoko gelenousive.

¹⁵ * Ámina oko vegenáne zuhagi nezagi áinigoko gelenoune. Nenemú není sipsip izamule loko minoko aleko oakánéa ahulanogo uve.

¹⁶ Itó sipsip izáne mulusi makó niave. Keza imane mikasigú vegenalitini geisa mikutí niamave. Neza kelémoko okugo, nonó lupamú gilingave. Lá ikiko, sipsip iza mulusi hamokó minanigave, itó ámina oko gizapa ve hamokó minanogo uve.

¹⁷ Neza minoko alekóne ahulanogo noukumule loko améneho agika nemeaká noive. Ahulokinake, gosohá goha alinogo uve.

¹⁸ Minoko alekónéa makolímo ipá aminogo ive. Nene nezáne nagata geleko ahulanogo uve. Neza minoko alekóne ahulatove loko itó goha alitove loko nenémini zámuza nenitoka neve. Nenémini itane loko améneho lonetonoimóma neve.

* **10:15:** Mat 11:27; Luk 10:22

¹⁹ Loko Izesú némika loko lokago, Zuta vegená keza giliake, goha ligí ahuligí iake, mini luga luga amó.

²⁰ Lá okago, mukilite holosi makó nene agikagú minokago gakó gopa nolinazo, nanamú gilinigi nilave.

²¹ Liki likago, lugáate láa liki lamó: Holosi makolímo agikagú minatimó nene, gakó nenémináa makó laminogo ive. Itó holosi makolímo kogómula lika vegenalitini kogómula ma ale goloutoketaminogo ive, liki lamó.

Zuta vete Izesuni ánihi ahulamó

²² Zuta vetini monó zagusave lusa gemó nenémini holiváa hepé gamena alitonoigo minamó.

²³ Izesú eza monó zagusave gaizopa agika makó agulizá Salomoni nenegú olío vogá ogá oko noigo,

²⁴ Zuta vetini monó gizapa ve keza iki alími vigiake, láa liki li amemó: Geza gamena hána nanamú mogonaka ale halá gekako, gele gopa oaká noune. Geza gologí oletative loko lo mololeta vema noitanimó nene lo utó moloko lo lemmane.

²⁵ Liki likago, Izesú láa loko lo kimimó: Neza lo lekemeaká noumóza, lekeza gili seketigí iki gilísá amave. Aménehini gakotó alévolé suni loló oaká noumó nenémo mogonáne lo utó moloaká noimole.

²⁶ Lekeza nene sipsip izáne lilí iki minamakeve liki gakóne gili seketigí amave.

²⁷ Sipsip izáne lilí iki nia vegenalite nonó lupamú giliaká niago, neza ánihioko geleketonougo némegetiaká niave.

²⁸ Neza alévolé kemetameni kemekugo, latila amiki mini lúaló miliki minanigave. Není nigizakutí ve makolímo keí ipá aminogo ive.

²⁹ Améneho nenitoka kelémo mola ve áisi nene netá matá mukí kivilegeko noigo, aménehini agizakutí makolímo ipá aminogo ive.

³⁰ Nezagi aménehiki leza hamokó nousive.

³¹ Loko lokago, Zuta vetini monó gizapa ve keza gehani goha aliake, apili hilinigi niago,

³² Izesú láa loko lo kimimó: Hoza lamaná haitopaitolímini nene aménehini gakotó aleaká noumóza, lekeza hí hoza ánígamó golesa okago gehanitunú nipili hilinigi niave.

³³* Loko lokago, Zuta gizapa ve keza anotó aliki láa liki lámó: Hoza lamaná aleaká noanikumú lamune. Geza lelikitana vema noanimóza, geza Ómasi avilegekanike gezakamú Ómasi nouve loaká noanikumú gehanitunú gipilinogo nounge.

³⁴* Liki likago, Izesú láa loko lo kimimó: Lekelí monó gotolaú Ómasímo goní hoza aliaká a vemú nene lekeza ómai netá niave loko lumole loko li gakó nene luhuva gizinamóma neve.

³⁵ Nene Ómasímini gakó utó okimi vegenakumú ómai netá niave loko limó nenazo, itó monó gotolaú luhuva gizinamoláa nene lemeko akatimoláa oko nomive.

³⁶ Nenemú améneho nelémo otopá zeake nimiselekago mikasiuka lumu ve neza Ómasímini gipala nouve loko lumó nenazo, nenemú lekeza nanamú Ómasi avilegeaká noane liki nilave.

³⁷ Hoza aleaká noumó nene ánígikiko, aménehini

* **10:33:** Liv 24:16 * **10:34:** Age 82:6

avotigí amikoma, gakóne gili ahulatamó nene lamaná onoive.

³⁸ Itó áinigiko, není hozagi aménehini hozagi hamó lelegitó onoikoma, gakónemukopa alévolé suni loló oaká noumó nene ánigalo. Ánigi guni itamó nene, améneho není nene akiseneive, itó neza ámina oko aménehini akiseneive liki giliiki mogonáa gili lamaná inigave.

³⁹ Loko loake, goha nagá aminigi niakutí ahu-loake vimó.

⁴⁰ * Vike Zota nagamí vola helega Zoní apí oko monó nagamí holoketa apató goha voko minamó.

⁴¹ Neneló noigo, vegená mukí aitoka anitiake, láa liki lamó: Zoní nene golivagi netá makó alemimóza, imane vemú gakola limóma mukí mota gihila zekave.

⁴² Liki liake neneló vegená mukilite Izesukumú gili alévolé amó.

11

Lasaló hilimó

¹ * Petania numutoka ve makó avisekago ako minamó, agulizá Lasaló. Aí atolage lositá áminaló minasimó, kugulizáini Maliako Matako.

² * Maliá nene Guivahani Izesuni nene anuva lamanaki netupa holomiake gotola zopovatunú agisa gilatoko ale lamaná ota venalímini agunala Lasaloni avisekago,

³ keza Izesutoka gakó láa liki ahulasimó: Guiv-ahanitemaka gelezo. Zogova vema netá napa avisekago akonoive.

* **10:40:** Zon 1:28 * **11:1:** Luk 10:38-39 * **11:2:** Zon 12:3

⁴ Liki likasigo Izesú nene gakó geleake, láa loko limó: Monéna hilitove loko gizalemive. Ómasímini lapaná utó itive loko, itó Ómasímini gipala není luhuva gegemá itive loko aviseneive, loko limó.

⁵ Izesú nene Lasaloki atolage Matakí Maliakimú agika kemenei vegená minamó nenazo,

⁶ nenemú Lasaloni avisi gakó geleake, ako mina numutó gamena lositá miní ameko minoake,

⁷ izegipala zuha láa loko lo limimó: Alo, Zutaia mikasiuka atiginá oko vitunize.

⁸ Loko lokago, izegipala zuha leza láa loko lo amunimó: Monó gizapa velemaka, Zuta vetini monó gizapa ve keza goí okoma vanitó gehanitunú gepele hilitune liki linamóma nenazo, goha vitune loko nolape.

⁹ Liki likago, Izesú láa loko lo limimó: Hoza gamena netekaki holisakaki únakaki vaí onoive. Makó keza holisakaláa lapanató gapo niviko, netá matá hanuva lotohá kepeleminogo ive. Neza hoza alito gamenaváne ha neve.

¹⁰ Makó keza lapaná nomiko holugú gapo vitamó nene, lotohá kipilinogo ive.

¹¹ Loko lo lemeake, miní ameko láa loko limó: Zogole Lasaló mota ako helekamóza, neza voko alémo otinogo uve.

¹² Loko lokago, izegipala zuha leza Guivahanitemaka, avó akonoitimó nene zokanogo inae.

¹³ Loko luhá nene, Izesú eza heleakakumú anoza gakó lo limitó leza hanuva akonoikumú lihe loko gele hee lamunike lokuko,

¹⁴ Izesú lo utó moloko láa loko lo limimó: Lasaló mota helekave.

¹⁵ Neza neneloka vamuke imaneloka nougo hiliikumú nene lekelikumule loko gele alévolé oakat-inímini gihila lilí itave loko mulúnegú lamaná noguluve. Nenemú áminaloka vitune.

¹⁶ Loko lokago, Tomasí agulizá makó Lopé áisi nene agivelagini láa loko lo limimó: Leza mukitoka voko ezagi hilitune.

Izesú helenosakutí oteoko alévolé oko minoaká amelaho noive

¹⁷ Loko lokago, makó vunimó. Vunike Lasaloni gale zimikago gamena losive losive oko vokago, Izesú nene Petania numutoka vo aniteake, ámina gakó gilimó.

¹⁸ Petania apá nene Zelusalegatí 3 kilomitasí minamó.

¹⁹ Nenemú Zuta vegená mukilite Matakó Maliako kugunáini helekagove liki ive nama ikitanigi vamó.

²⁰ Lá ikago, Matá eza Izesú noave lámó ge-leake, Maliá nene numukú noigo, vike gapoló hotu lasimó.

²¹ Izesuki hotu likasike, láa loko lo amimó: Guiv-ahanínemaka, geza imaneló minatilina, nugunáne nene helemiline.

²² Itó itínasagi nene nemú manamú Ómasiloka voká lokako, gele gimitimóma neve loko gele-nouve.

²³ Loko lokago, gugunaka nene mómoká oko otinogo ive.

²⁴ Loko lokago, Matá láa loko lo amimó: Minoko gamena napaló Ómasímo vegená mukí lelémo otitító nene ezagi otitimóma neve loko gelenouve.

²⁵ Loko lokago, Izesú láa loko lo amimó: Nénisi helenosakutí oteoko alévolé oko minoaká amelahina nouve. Makó keza nenikumú gili alévolé itamó nenete hiliiki goha otiki miniki aliki ini-gave.

²⁶ Itó makó keza kogómulagi miniki nenikumú gili alévolé itamó nenetini kigika ma helemínogo ive. Minoloko voko minanogo ive. Geza imane nolu gakó mota gele seketigí onoape.

²⁷ Loko lokago, Matá limó: oo, Guivahanínemaka, geza gologí oletatane loko lo mololeta vema Ómasímini gipala mikasigú lemenane liki lina ve noane loko nigikatunú mota gele alévolé onouve.

Izesú ive imó

²⁸ Loko loake, mohó agunala Maliani nene sele lo ameake, musika loko monó gizapa vema oake, geikumú nolive.

²⁹ Loko lo amekago, Maliá nene geleake, litá oko oteko Izesutoka vimó.

³⁰ Novigo, Izesú nene numutoka velesá vo anitemike, Malatani gakó lo ami apatoka minamó.

³¹ Lá noigo, Maliá eza litá oko oteko nolimigo, Zuta vegená numunagú makó miniki ive nama itiki mina vegenalite Lasaloni militamómaloka ive inogo novihe liki ámegetiki vamóza,

³² Maliá eza Izesú noitoka aniteake ánigoake, agihúna geko akoake, Guivahanínemaka, imaneloka noako nelina, nugunáne helemiline.

³³ Loko loake, ive imó. Ive noigo, Zuta vegená ámegetiki vamoláa keza ámina iki alími vatí iki ive niago, Izesú nene ánigoake, mulunagú miluma napa geleake, agika hizekago,

³⁴ loká oketake hikuka gale zinave. Loko lokago, Guivahanitemaka, oko ánígatane.

³⁵ Liki likago, Izesú nene agómulagutí leke leke lokago ive imó.

³⁶ Ive okago, Zuta vegenalite ániagiake lamó: Ánigalo. Agika nene aí ame gikitoko amenei ve neinogo ive.

³⁷ Liki likago, keikutí lugáate lamó: Goí oko agómula lika ve makóma ale goloutotamóma nenazo, imane ve hanuva alémo zokaline.

Lasaló heleneikutí alémo otimó

³⁸ Liki likago, Izesú goha miluma napa geleake, matimatiló anitemó nene geha mulí minamó, itó agepaló nene gehani napa mili lí amóma nene

³⁹ Izesú ániagoake, gehanima ali ahulalo loko lokago, hili vémini atolaho Matá láa loko lo amimó: Guivahanínemaka, gamena losive losive minokanazo, mota anuva noinogo ive.

⁴⁰ Loko lokago, Izesú láa loko lo amimó: Nenikumú gele alévolé itanimó nene Ómasímini zámuzalámini luhuva utó iko ániganogane loko lo gumu gakó mota gagatí molokahe.

⁴¹ Loko lokago, gehanima akili ahulikago, Izesú nene okena oko velekuka ániagoake, láa loko limó: Aménega, geitoka lonoumó nene geleanikeve loko gegepoka noluve.

⁴² Itó gamena gamena geitoka loaká noumó nene gelenane loko gelenoumóza, imane ali nupa nia vegenalite géisi nimiselekako limimole liki gili zagiki gilitave loko láa loko lo nogumuve.

⁴³ Loko loake, gakó napagutí sele loko Lasalo, geza oteoko lemeno.

⁴⁴ Loko lokago, helenei vémo agisa agizatoka nagá likita netá akoheminago lemekago, Izesú vínasiki ali ahulitalo loko lokago, vínasiki ali ahulitamó.

Izesuni apili hilinigi gohoni milamó
(Mat 26:1-5; Mak 14:1-2; Luk 22:1-2)

⁴⁵ Lá ikago, Zuta vegená Maliatoka anitemoláa keitokatí mukilite Izesú oko moloko i netá ánigiake, aikumú gelego alévolé imóza,

⁴⁶ lugáate Palisaio monó vegenatoka vake Izesú oko moloko i gakó avetó i kememó.

⁴⁷ Avetó iki li kimikago, kezagi guguni giziaká a vegi monó kansole kilími nupa iake láa liki lamó: Imane lu avevezaha la avevezaha mukí okanazo, leza nana itune.

⁴⁸ Leza nene amanapa oko nouko, eza lá oloko vova vova noiko, mukí vegenalite lugulizaki ve napa noive liki gili zaginigave. Lá ikiko, Loma gevenalitini ami vete iki lova ali limiiki monó zagusavele nemó vegenate niamó ali tolova inigave.

⁴⁹ Liki likago, keitokatí makó agulizá Kaiapá ámina kilisimasi oko novigo guguni giziaká vetini gizapa ve loló i vémo láa loko lo kimimó: Lekelisi negi nagi niaze.

⁵⁰ Leza Zuta ve mukitoka latila o asú okatuninazo, ve hamokolímo lelémo nupa napa oko helekiko nenémo netá gihila ale utó oletative liki gilísá amave.

⁵¹ Loko limó nene ezáa agata geleko ligopa, eza ámina kilisimasiló nene guguni giziaká vetini ve napa minoakeve loko Izesú eza vegená mukikumule loko hiliti gakó lo kimimó.

⁵² Nene Zuta vegentakumukó lamimó. Ómasímini vegenala zuha numutó namató nia vegená kelémo nupa okiko mulusi hamokó miliki minatave loko hilitikumú limó neve.

⁵³ Láa loko lokago guguni giziaaká a ve keza ámina zupa nene Izesuni apili hilinigi apí iki lova gizamó.

⁵⁴ Lá ikago, Izesú eza Zutaia apakú vegenalitini kogómulaló goha vo utó amike mikasi gomopalaló minamó. Nenémini agataloka apá makó minamó, agulizá Epalaima neneloka izegipala zuhagi makó minunimó.

⁵⁵ Nouko, Zuta ve avotegini asenini zeketakumú gele minoaká holisi alitokago, apá koma kamalokatí vegená mukilite kugupe kigikáini ali guluvtanigi goí iki Zelusalega tivamó.

⁵⁶ Viki monó zagusave napagú itiki niake Izesú noamigo vitagá ake, ligili hagili niake lekeza nanave liki nigeleve. Áisi nene holisigú atimó nehe amitimó neve.

⁵⁷ Liki lamó nene guguni giziaaká a ve napagi Palisaio monó vegi keza ve makolímo Izesú minoko aleko noiti apá ánigoko geleko onoitimó nene oko lo lemekiko, gelekinake voko nagá amitune, liki amunaló li miliki lató nene ámina gakó lamó.

12

Petania numutoka Izesuni anuva lamanaki netupa holotamó

(Mat 26:6-13; Mak 14:3-9)

¹ Asenini zeketakumú gele minoaká holisi gamena alitokago gamena 6-a veletoka ha nego, Izesú eza Petania numutoka vo anitimó. Ámina

apató nene emane amunaló Lasaloni heleneikutí alémo otimó.

² Áminaló nene nosánetá gizi vatá ikago, Matá nene hizeko gona moloko ale nokimigo, Izesú nene Lasalogegi makó minake nosánetá namó.

³ * Niki niago, Maliá nene anuva lamanaki netupa agulizaláa nalita loko meinava iteko mina netá nene hapu lita potologú minamó nene Izesú agisalo holomiake, gotola zopovalatunú gilatoko ale lamaná otamó. Lá okago, numukuka anuvámo moloake minamó.

⁴ Lá okago, izegipala zuhagutí ligive makó Kaliotó numutotí ve agulizá Zutá eza minoko Izesú amimika liti ve nenémo láa loko limó:

⁵ Anuva lamanaki netupa hanuva minatinazo. Nenémini meinava moni gó losive makole hizekoko gohogó vegená kemekuko etatinazo.

⁶ Loko limó nene gohogó vegenakumú geleko limó negopa, áisi nene lelí moniló gizapa oko noigo moni alimi namego, ale halá halá geko minoaká inazo, nenemú limó.

⁷ Loko lokago, Izesú nene limó: Ahulikalo. Helekugo gale zinitanigi anuvavagi netupa nene nugupeló hilinitatakumú geleake loló onimikave.

⁸ * Gohogó vegená keza nene lekezagi miniliki viki minaniganae. Neza nene lekezagi mino-loko voko minaminogo uve.

Lasaloni apilinigi lova gizamó

⁹ Loko lokago, Zuta ve mukilite Izesú neneloka noive liki nila gakó giliake áminaló anitemó nene

* 12:3: Luk 7:37-38 * 12:8: Gapo 15:11

Izesukumukó nomimó. Lasaloni emane amunaló heleneikutí alémo oti vegi ániganigi amó.

¹⁰⁻¹¹ Ikago, Lasaloni alémo otikumú nene Zuta vegená mukilite Zuta vetini monó gizapa ve ahulikimiake Izesutoka viki gímiziki aikumú gili alévolé amó. Nenemú guguni giziaká a ve napa keza Lasalonigi apele hilitune liki lova gizamó.

*Sigaga litanigi ago Izesú Zelusalega vimó
(Mat 21:1-11; Mak 11:1-11; Luk 19:28-40)*

¹² Akiake gó lokago, holisiló a vegená mukilite Izesú Zelusalega noave gakó giliake,

¹³ * kokonasi agila letiki Izesú ati gapoló militanigi aliki vamó. Hotu liake sigaga litimi ni-vake agae, Guivahanímini gakotó anitelimikane. Ómasímo lusa gegetatize. Isilae ve lelí gugulizaki vele noane.

¹⁴ Liki nilago, Izesú eza toki iza akaleva makó ánigoake, amupiló iteake vimó. Nene monó goto-laú gakó láa loko minató gele minake lá imó:

¹⁵ * Zaion agokaú vegená lekeza lekelegesá legemino. Gilinahe. Agulizaki velini nene toki iza akalevámmini amupiló iteake noave.

¹⁶ Ámina gakó nene izegipala zuha leza goí oko gele vevesamunimóza, alika Izesú nene okulumá lapanalagú atiginá oko itekago, nene gakó goha gelekunike, ámina gakó aikumú gizi milamómalo ámina avevezaha itake lá amó neve loko gele vevesunimó.

¹⁷ Itó Izesú nene Lasaloni sele lo amekago heleneikutí gonosi galegutí limigo ániga vegená

* **12:13:** Age 118:26 * **12:15:** Zak 9:9

mukilite keza ámina sunimú vegená lugáa avetó iki li kimiki minamó.

¹⁸ Ámina sunímini gakó giliake, mukilite gapoloka hotu lanigi vamó.

¹⁹ Lá ikago, Palisaio monó vete kezáini ligili hagili niake lekeza gilinahe. Hizi lí itata hoza nalemó nene gihila nomigo, vegená mukitoka aitoka gímizi asú niave, liki lamó.

Kiliki ve makolite Izesunimú vitagá amó

²⁰ Ámina holisigú Ómasi geké lotatune liki Zelusale numutoka tiva vegenakutí Kiliki ve lugáa minamó.

²¹ Keza nene Galilaia mikasiuka Petesaita numutotí ve Pilipó noitoka vake, ve lamanámaka, Izesuni ánígatune loko nounge.

²² Liki likago, Pilipó nene Etuluni lo amekago, ezagi makó viki Izesuni li amikasigo,

²³ ezáa hilitikumú anoza gakó láa loko limó: Okulumakutí lumu ve gihila není lapanánegi luhuváa utó iti gamena mota alitokave.

²⁴ Lamaná lo likimitoze, gililo. Kilé zuha makó nene mikasigú hizemitunimó nene hanuvagó minanogo ive. Mikasigú hizekuko, lemeko nenegú helekoko mikasímini nosánetá loló okoko gihila mukí zinogo ive.

²⁵ * Áminámini oko makó keza kigika kemeníikumú gilikiko ititimó nene, alikaloka kigika kemeni gopa inogo ive. Makó keza mikasigú miniki nenikumule liki kigika kemeníikumú gilikiko limitimó nene alévolé kemetameni ali luhanigave.

* 12:25: Mat 10:39, 16:25

²⁶ Ámina Kiliki vehe itó vegená makó ahe neni gelekelé izegipa minatune liki gilitamó nene némegetiki ataze. Lá ikiko neza minomo ititotoka gelekelé izegipánegi makó minanogo une. Itó nasahilí initata vegenalitini kugulizá nene améneho ale otinogo ive.

Izesú ezáa hilitikumú lo kimimó

²⁷ Nigika ololó oake, luvaluvo zekave. Lá okazo, nenemú nanave litove. Aménega, gamenaváne alitokaze, nugupeló ititi netá molo hotó onetozo litomó nene etamitinazo, láa loko lamitove. Miluma gilito netá mota numupiló itinogo noigo, game naváne okaze.

²⁸ Nenemú aménega, geza lokako, gugulizalímini luhuva utó itive. Loko lokago, okulumakutí gakó láa loko limimó: Nugulizalímini luhuva mota gonanalivagi utó okamóza, utó oloko voko utó okogó minanogo ive.

²⁹ Loko ligo, vegená mulusi miliki minamó keza giliake, ageló makolímo gakó lo amekave.

³⁰ Liki likago, Izesú láa loko lo kimimó: Gakóma nene nenikumule loko nomive. Lekelikumule loko utó okave.

³¹ Itína Ómasímo imane mikasigú vegenalitini lihimáinimú meina kimiti gamena mota alitokave. Itína imane mikasigú agulizaki Satani amisilinogo uve.

³² Imane mikasigutí zaló nilími otikiko, numutó namató vegená alesá molo kemekugo, nenitoka imi asú inigave.

³³ Loko limó nene zohota zaló hilitikumú anoza gakó limó.

34 * Loko lokago, mukí mina vegenalite láa liki li amemó: Leza monokú nene gologí oletative loko lo mololeta ve eza nene helemoko mino lúaló moloko minanogo íve liki luhuva gizina gakó gelenounimó nenazo, geza okulumakutí lumu ve gihila nene zaló nilími otikiko hilitove loko nanamú nolape. Okulumakutí limi ve haitolíminimú nolane.

35 Liki likago, Izesú láa loko lo kimimó: Ló liví nene gamena komáisi holutikú hanatanogo íve. Nenemú límugusi nenémo lekelitoka sinitokatize, ló livíma lekelitoka lapaná noliko aliiki minalo. Ve makó keza límugusi gapogú vitamó nene, gapo ángi hee laminigave.

36 Nenemú livíma lekelitoka miniko, ali lá ilo. Lekelisi livilímini mututoni loló itune likima nenikumú gili alévolé ilo, loko limó.

Zuta vete gili alévolé amamó

Izesú nene gakó láa loko loake vo halá geko minamó.

37 Izesú eza haitopaitó suni kogómulaló ale utó okago ángamóza, aikumú gili alévolé amamó.

38* Lá amó nene Ómasímini agepagutí gakó loaká ve Isaía li gakó nene alévolé itíve liki lá amó. Eza lo goselé ike gakó láa loko luhuva gizamóma neve: Guivahanínemaka, gakoka lokuko vegená nanakilite gili alévolé inave. Itó Guivahanímini zámuza éahitoka utó okago gele zageneive.

39 Itó Isaiani gakó makó láa loko luhuva gizató keza gili alévolé amamó neve:

* 12:34: Age 110:4; Isa 9:7; Tan 7:14 * 12:38: Isa 53:1

40 * Áisi kogómula gahaga like kigika ale gopa okago, keza kogómulatunú netá matá ánihi hee lisá amave. Kigika ali viligamago, kelémo lamaná itomoláa nomive.

41 Loko Isaiá limó nene Izesuni lapaná okulumakú nego ánihoake limó neve.

42 Lá okago, Zuta vetini gizapa vegutí lugáa nenete Izesukumú gili alévolé amóza, lo utó itunimó nene, Palisaio monó ve nenete monó gapo hizi lí ilimikatave liki kehelele vizekago, li utó amamó.

43 Keza vegená makolite legegoka litave likigó iki miliki iaká amó neve. Ómasímo lelémo napa itive liki iki miliki isá amamó neve.

Izesú lo molonoi gakolímo alika goní oletanogo ive

44 Lá okago, Izesú nene gakó napagutí láa loko limó: Makó keza nenikumú gili alévolé itamó nenete nenikumukó negopa, nimisili ve aménehinimuki gili alévolé inamó geleneive.

45 Makó keza není ánihi hee litamó nenete nimisili vegi ánihi hee hee linamó geleneive.

46 Nenikumú gili alévolé ita vegenalite límugusigú minamitave loko mikasiuka vegenalitini liví minanogo lemenoumóma neve.

47 Makó keza gakóne imane giliiki gili ahulatamó nene, nénisigó goní oketaminogo uve. Nénisi nene mikasiuka vegená lihimá kimitove loko negopa, numutó namató vegená kugutó vizitove loko lumumóma neve.

48 Makó keza není ahuli hotó inimiiki není gakó ahulatamó nene, gakó lo mulumó nenémo gamena napaló goní oketanogo ive.

* 12:40: Isa 6:10

⁴⁹ Nezáne nagata geleko losá amuve. Améneho nimisili vémo lo utó itane loko lonimikago loaká nouve.

⁵⁰ Lá nouke, neza agepagutí gakó nenémo alévolé oko minoaká mogona ale utó oaká noive loko gelenouve. Gakó nolumó nene améneho litokó loaká nouve, loko Izesú limó.

13

Izesú izegipala zuhatini kigisa nagamí zeke-tamó

¹ Avotegini asenini zeketakumú gele minoaká holisi alitokago, gamena hamokó veletoka ha nego, Izesú nene imane mikasi ahulokinake aménehitoka atiginá oko itito gamena mota alitokave loko geleake, imane mikasiuka aí mututoni lilí a vegená agika lemeneike agika limitimini mogona lelepizinogo netá makó alimó.

² Nosánetá nanogo alegesá okuko, netá makó lá oko utó imó. Kaliotó numutotí ve Saimoni gipala Zutani agikagú nene Satá iteake alémo vávani okago, Izesuni amimí inogo gilimó.

³ Lá okago, Izesú nene améneho eza netá matá mukí nene nigizakú molonoimóma neve loko, itó Ómasilokatí lumutímina goha nene Ómasiloka atiginá oko itinogo uve loko geleneike,

⁴ nosánetá noko minuhakutí oteake, luhoaká gola hána nene gololohá oake, tauli aleko gohalaló likeake,

⁵ nagamí nene lapegú leke moloake, izegipala zuhatini ligisa nagamí zelimiká taulitunú gila-tolimiká oloko vike,

⁶ Saimon Pitá noitoka vokago, eza láa loko lo amimó: Guivahanínemaka, není nigisa nene géisi nagamí zenetatove loko nolape.

⁷ Loko lokago, Izesú láa loko lo amimó: Imane loló nou suni nenémini mogonáa itínasa gelemané. Alike minomo iteko gilinogo ane.

⁸ Loko lokago, Pitá nene není nigisa nagamí zenetaminogo ane. Loko lokago, Izesú nene nénisi nagamí zegetamitomó nene, gezagi nezagi apizeminogo usive.

⁹ Loko lo amekago, Saimon Pitá láa loko lo amimó: Guivahanínemaka, láa lokoma nigisagó negopa, nigizanigi gotónegi mukí nagamí zenetatane.

¹⁰ Loko lokago, Izesú anoza gakó makó láa loko lo amimó: Makó keza nagamikú akiiki alike nene kigisagó nagamí zikiko nene, kugupe nene guluvito asú inogo ive. Lekeza nene áminagó iki likigika guluviti asú inamóma nemóza, lekeza mukitoka guluviti asú ikigó minamave.

¹¹ Loko limó nene ve makó hí vémo amimika litikumú geleneike, lekeza mukitoka guluviti asú ikigó minamave loko lo limimó.

¹² Ligisa nagamí zeletó asú oake, gola nene goha ale luhoake, mitó minake láa loko lo limimó: Imane loló oleketu netalímini mogonáa mota gili hee linahe. Olile.

¹³ Lekeza nenikumú nene Guivahaniteve itó ti-saleve liki liaká niamóma vatí iki liaká niave.

¹⁴ * Itó neza Guivahanitini itó tialinímína gelekélé oleketuke likigisa nagamí zelikimikumó nenazo, lekezagi ámináminiki lukugupe alimi

* **13:14:** Luk 22:27

limiki likigisa nagamí eza zetiko eza zetiko iliki viki minalo.

¹⁵ Imane gelekelé olikimiaká suni naleleketumó nene lekezatini ámináminiki aliliki vitave loko apí o nolukumuve.

¹⁶ * Neza lamaná lo likimitoze, gililo. Gelekelé izegipa makó nenémo golohá veva avilegeakala nene nominazo, lukugupe aliki itikatave loko noluve.

¹⁷ Itó gakó nolumó nene gilinamó nenazo, áminama amegesaló milatamó nene Ómasímo nónohá zeleketa vegená minanigave.

¹⁸ * Gakó nolumó imanémo lekelí mukitoka ale asú amive. Neza nene lekelémo etó onou vetini mogonatini gelenoumóza, monó gotolagutí gakó makó láa loko neve:

Nosánetá noko minusi ve nenémo není nehelú
okave
liki luhuva gizina gakó nene ve makotoka alévolé inogo ive.

¹⁹ Itó ámina netá utó okiko, lekeza lo lekemeaká nou ve noive liki gili seketigí itave loko ámina netá velesá utó onamigo lo nolukumuve.

²⁰ * Neza lamaná lo likimitoze, gililo. Makó keza amisilito ve makó nasahilí itatamó nene, hoza amelahina neniki nasahilí initamó gilinogo ive, itó makó keza nasahilí initatamó nene nimisili vegi nasahilí itamó gilinogo ive.

*Izesú aí amimí iti vemú lo utó imó
(Mat 26:20-25; Mak 14:17-21; Luk 22:21-23)*

* **13:16:** Mat 10:24; Luk 6:40; Zon 15:20

* **13:18:** Age 41:9

* **13:20:** Mat 10:40; Mak 9:37; Luk 9:48, 10:16

²¹ Itó Izesú ámina gakó láa loko lo asú oake, muluna gitihiná okago, láa loko lo utó oko lo limimó: Neza lamaná lo likimitoze, gililo. Lekelikutí ve makolímo nimimika linogo ive.

²² Loko lokago, izegipala zuha leza gonú gimisi okunike nene, éahikumú live lokunike nene, gele gopa unimó.

²³ Lá okuko, eza Izesú agika nemeaká i veve liki lina vémina amatoka nougo,

²⁴ Saimon Pitá agizanitunú avevezaha ike éahikumú nolihe loká okako lo gimino loko lokago,

²⁵ neza Izesuni amatoka nouke loká otuke Guiv-ahanínemaka, éahikumú nolane.

²⁶ Loko lokugo, Izesú láa loko limó: Nosánetá nagamikú lupizeoko amekugo nati vemú noluve. Loko loake, nosánetá lupizeake, Kaliotó ve Saimoni gipala Zutani nene amimó.

²⁷ Amekago, nokago, Satá nene agikagú itekago, Izesú láa loko lo amimó: Geza netá matá loló itove loko lanimó nene litá oko loló ozo.

²⁸ Láa loko lo ami gakó nene agivelage leza makó minuni vete gele hee lamunimó.

²⁹ Lá unike, lugáa nenete Zutá nene moni gotó gizapa oaká imó nenazo, nenemú holisigú nosánetá meina hizitive loko namisilihe loko nene gelehá. Itó lugáa nenete gohogó vegená nene moni gona moloko kimitive loko namisilihe loko gulunimó.

³⁰ Lá okuko, Zutá nene nosánetá noake, agupegú límugusi zekago hetoka lemeko vimó.

Gosohá lo hukoketa gakó

³¹ Hetoka lemekago, Izesú láa loko limó: Itína okulumakutí lumu ve gihila není nugulizalímini luhuva mota gonanalivagi utó inogo ive.

³² Ómasímini agulizalímini luhuva gonanalivagi utó noiko, Ómasímo lokiko, nugulizalímini luhuva nene litá oko gonanalivagi utó inogo ive.

³³ * Izegipánemata, gililo. Lekezagi gamena koma mininake vitove. Vokugo, lekeza nenikumú vitagá itamóza, amunaloka Zuta vegená lo kumumómámini oko itínasa láa loko lo nolukumuve. Neza voko minatotoka nene lekeza aminigave.

³⁴* Itó itínasa gosohá láa loko lo nohukoleketuve. Likigika eza amiko eza amiko ilo. Neza nigika lekemenoumó nenémini iki likigika eza amiko eza amiko iliki vilo.

³⁵ Likigika eza amiko eza amiko itatímo nene, vegená mukilite lekelikumú nene není izegipáne zuha niave liki gilinigave.

*Izesú Pitá alika egamega otatikumú limó
(Mat 26:31-35; Mak 14:27-31; Luk 22:31-34)*

³⁶ Láa loko lokago, Saimon Pitá nene Guivahanitemaka, hitoka vitane. Loko lokago, Izesú láa loko limó: Apá makotoka vitomó nene itínasa némegetamitanimóza, alika némegetanogo ane.

³⁷ Loko lokago, Pitá láa loko lo amimó: Guivahanitemaka, itína neza nanamú gémegetaminogo uve. Geikumule loko minoko alekóne ahulatove loko ale vatí okumóma nena.

³⁸ Loko lokago, Izesú lo amike limó: Nenikumule loko minoko alekóne ahulatove loko nolape. Íi, lamaná lo gimitoze, gelezo. Azo neteká

* **13:33:** Zon 7:34 * **13:34:** Zon 15:12,17; 1 Zon 3:23; 2 Zon 5

nene okoloho nenémo anó velesá molonamiko, nenikumú nene ánigonamuve loko egamega one-tatanimó nene gamena losive makole inogo ive, loko lo amimó.

14

Izesú nene Ómasiloka voaká gapo noive

¹ Izesú gakó makó láa loko limó: Mulutini lepa hiziko minalo. Lá iki miniki Ómasimú gili alévolé iki nenikumuki gili alévolé iki minalo.

² Aménehini numukú numuni agika vaí oko neve. Lá oko nomilina neza voko apá makó ale vavá oleketatove loko lamuline.

³ Neza voko apá makó ale vavá olikimioko min-inake, atiginá oko oko lekelémoko vokugo, neni-toka minatave. Lá niiki neza minato apakú nene lekezagi makó minanogo une.

⁴ Neza voko minato apalímini gapováa lekeza áninigave.

⁵ Loko lokago, Tomasí lo amike limó: Óe, Guiv-ahanitemaka, geza voko minatani apaláa gelemune. Nenemú gapováa nana oko gilitune.

⁶ Loko lokago, Izesú láa loko lo amimó: Gapovagi itó gakó gihilagi itó alévolé oko minoakalímini amelahina nénisi nene nouve. Není niviligiiki aménehitoka viki anitiakala nene ma nomive.

⁷ Lekeza nenikumú gili vevesalina, aménehikumuki gili vevesaline. Itína aikumú gili vevesiake, aí mota ánigikave.

⁸ Loko lokago, Pilipó nene Guivahanitemaka, ametehini lelepizekako, netá makokumú loká ogetamitune.

⁹ Loko lo amekago, Izesú láa loko lo amimó: Pilipo, gamena hána lekezagi minumóza, geza není velesá ánigo hee hee lamape. Ve makolímo není ánigonoiti vémo aménehinigi ánigo noimó gelekave. Nenemú geza nanamú ametehini lelepizezo loko nolane.

¹⁰ Améneho nene není ale akiseneive itó neza nene aménehini ale akisenouve loko géisi nene gele zagemape, olo. Gakó lo nolukumumó nene neza nagata geleko lo lekemesá amuve. Alévolé suni aleaká noumó nene nigikagú noi ve aménehini zámuzaló utó oaká noive.

¹¹ Améneho nene není akiseneive liki, itó neza aménehini akisenouve liki gili zagitave loko nolumóza, ámina gakó nigiliki gihila zemikoma alévolé suni aleaká noumó nenemú nenikumú gili alévolé ilo.

¹² Neza lamaná lo likimitoze, gililo. Nenikumú gili alévolé itamó nenete alévolé suni aleaká noumó áminagó iki alinigave. Itó nenegó nomive. Neza aménehitoka itekinake Sikalahú amisilitomó nenazo, aí zámuzatunú alévolé suni lilí itamó nene není hoza aviligiki alinigave.

¹³ Itó lekelisi nene není nugulizá ali miniki netá makokumú voká litamó nene, aménehini agulizá ale hutilí itove loko gele lekemekogó minanogo uve.

¹⁴ Není nugulizá ali miniki netá makokumú voká litamó nene gele likiminogo uve.

Sikalahula amisilinogo lo hutamó

¹⁵ Likigika nenitoka miliaká niamó nekoma nene není gakó gili alinigave.

¹⁶ Lá niiko, nénisi aménehitoka lokugo, izotipo loló oko luhusatini ale kii liti ve amiselekiko, lemeko lekezagi mino lúaló moloko minanogo ive.

¹⁷ Gakó gihila gotoláa nene Sikalahukumú noluve. Nene monó gelema vegenalite aí ánihi hee hee lamamó, itó mogonalamú gili hee hee lamamó. Nenemú aí aleminigave. Lá onomóza, lekezagi minake likigikagú lemeko minoaká noimó nenazo, mogonala nene lekelisi gilinamóma neve.

¹⁸ Neza ahulolikimikugo, megusa lilí iki minikatave loko neza lekelitoka goha anogo uve.

¹⁹ Gamena alínipa makó neize. Nene gamena asú noiko, monó gele zagemita vegená nenete není goha ániagamitamóza, lekelisi nene ániganigave. Neza gosohá minoloko iteakalímini amelaho nounazo, lekeza áminagó iki gosohá miniliki itinigave.

²⁰ Gamena nene zupa lekeza nene améneho není ale akiseneive itó lekelí neza ale akiseneive itó lekelisi není ali akisinave liki gili hee hee linigave.

²¹ Makó keza negepagutí gakó ali miniki gili aliaká nia vegená nene lamaná kigika nimiaká nia vegená niave. Itó kigika nimitamó nene, améneho agika kiminogo ive. Itó nezánegi nigika kiminake mogonáne lo utó oko lo kiminogo uve.

²² Loko lokago, Kaliotó numutotí ve Zutani apolaho loká otake Guivahanitemaka, geza nana okoko mogonaka lelitokagó lo utó okoko monó gelema vegenatoka halá gitane.

²³ Loko lokago, láa loko lo amimó: Ve makolímohe agika nimitimó nenémo gakóne nene gele alekiko, améneho áminagó oko agika

aminogo ive. Lá okoko nezagi lositá aitoka voko anitekisinake agikagú minoko aleko inogo usive.

²⁴ Makó keza kigika nememitamó nene, gakóne gili aleminigave. Itó gakó imane lo nolukumumó nene není gakó nomive. Améneho nimisili vémini gakó lo nolukumuve.

²⁵ Neza nene lekezagi minuke gakó imane lo lekemeaká noumóza,

²⁶ izotipo loló oko luhusatini ale kii liti ve Sikalahú nene améneho není nugulizató amiselekiko, lemeko netá mukikumú apí o lekemeko nénisi lo lukumu gakó nene ale gosohá oleketoko lo lekemeko minanogo ive.

²⁷ Není helisa nene hulu nolukumuve. Hanuva vegenalitini hulu lekememuve. Nezáne hulu nene nolukumuve. Nenemú likigika nene ololó okoko lekehelele vizemino.

²⁸ Neza voko nomininake lekelitoka goha atiginá itove loko lo nolukumugo gilinamóma neve. Likigika nenitoka miliiki minamó nelina nene, améneho nivilegeko noinazo, aménehitoka ititokumú giliiki mulutikú lamaná geleline.

²⁹ Imane netá utó okiko lekeza ánigiki nenikumú gili alévolé itave loko ámina netá utó onamigo goí oko lo nolukumuve.

³⁰ Neza nene gakó mukí miní ameko lo lekememitove. Imane mikasigú agulizaki ve Satá nenitó oko nehelú itove loko ale vatí okave. Áisi nene okoko ma nehelú aminogo imóza,

³¹ monó gelema vegenalite nigika aménehini ameká noumó itó hoza gakó lonetamó nene aleaká noumó nene ánigi hee hee litave loko imane suni aleaká nouve. Lekeza otilo. Mota

vitunize, loko limó.

15

Izesú nene vain nagá mogonáa lamaná noive

¹ Izesú miní ameko láa loko lo limimó: Neza nene vain nagá mogonáa lamaná nouve. Itó améneho nene vain miní amelaho noive.

² Nenitokatí izana makolímo gihila zemitimó nene hukoko alahulanogo ive. Itó hupena makolímo gihila zekiko, gihila vauva aleko zitive loko golesa itimoláa huko ahuloaká noive.

³ Lekeza nene monó lo lukumugo gili alévolé niatímo likigikagú mota guluvitiaká niave.

⁴ Lekelisi nene nenitoka iki apiziki minatamó nene, neza lekelitoka voko apizeko minanogo uve. Izana makolímo mogonaló apizeko minamitimó nene gihila zeakaláa ma nomive. Lekeza nene nenitoka iki apizemitamó nene, lekelitoka áminagó oko gihila ma zeminogo ive.

⁵ Vain nagá mogonáa nénisi nene nouve, itó lekeza nene izanáa niave. Makó keza nenitoka iki apiziki minatamó nene, neza áminagó oko keitoka voko apizekugo, keitoka gihila mukí zinogo ive. Lekeza nene nenitoka gímizemiki netá gihila lilí iakaláa ma nomive.

⁶ Makó keza nenitoka iki gímizemitamó nene, izanagitana oko gulugulu vizekiko, hukoko alahulanogo ive. Izanáa nene gulugulu vizekago, hukiki lokú giziaká niave. Nenitoka iki gímizema vegena-toka ámina suni utó inogo ive.

⁷ Lekeza nene nezagi apiziki minatamó itó gakóne likigikagú minatimó nene, netá nemú manamú voká litamó nene, utó olikiminogo ive.

⁸ Lekelitoka gihila mukí zekiko, lekeza lamaná není vegenáne zuha lilí iki minatamó nenémo aménehini lapaná nene gonanalivagi utó inogo ive.

⁹ Améneho nene agika nemeaká noive. Neza ámináminoko nigika ameaká nouve. Lá okago, lekeza nene nigika lekemeaká noutímini agikagú minalo.

¹⁰ Neza améneho loneta gakó gele alekuke, agika nemeaká noitímini agikagú noumó neve. Ámináminiki loleketonou gakó gili alitamó nene nigika lekemeaká noutímini agikagú minanigave.

¹¹ Není mulúnegú agila guluma oaká noi netá nene mulutikú minative loko, itó mulutikú agila guluma itimó nenémo hutilí oko vaí oko minative loko gakó imane lo lekeme asú nouve.

¹² * Láa loko nololeketuve. Nigika lekemeaká noumó nenéminiki lekezagi likigika eza amiko eza amiko iliki viki minalo.

¹³ Makó eza agivelagininimule loko minoko aleko imoláa ahulatimó nene, agika kimimómámini mogona utó inogo ive. Haitolíminoko agika kemeaká nenémo lá oko agika kimi suni avilegemitimó neve.

¹⁴ Lekeza loleketonou gakó ámegetatamó nene zogone milanigave.

¹⁵ Gelekelé izegipa makolímo gizapa vevámo oko moloko i netakumú gelemínazo, neza goha lekelikumú nene gelekelé izegipáneve loko lamitove. Neza nene aménehitokatí gakó gulumó nene lo utó oko lo lekeme asú okumó nenazo, itína lekelikumú zogone niave loko litove.

* 15:12: Zon 13:34; 1 Zon 3:23

¹⁶ Lekelisi není nene nilími etó amave. Nénisi nene lekelémo etó okugo, lekeza viki gihila ali utó ikiko alévolé oko minova minova oko minative loko leleketumóma neve. Lá iiki není nugulizá ali miniki netá nemú manamú aménehitoka voká litató likiminogo ive.

¹⁷ Likigika eza amiko eza amiko itave loko nololeketuve.

Monóini nomi vegenalite Izesuni lova ali amiaká niave

¹⁸ Monó gelema vegenalite lova ali likimikikoma Guivahanite mikasigú noigo goí iki lova ali amemóma neve liki gili minalo.

¹⁹ Lekeza monó gelema vegenalitini mulusigutí minalina, keza kigika lekemeline. Neza nene holúikutí lekelémo etó okugo, keza iki miliki a netá nene lekeza ahulikamóma nenazo, nenemú lova ali likimiaká niave.

²⁰ * Gelekelé izegipalaló lilí itatamó nenémo gizapa véa lilí ita netá avilegeminogo ive loko lo lukumu gakó nene lakagatí molamino. Keza není gopoguni milinimiaká nianazo, lekezagi áminagó iki gopoguni mililitanigave. Není gakó ali gúemamó nenazo, lekelí gakó ámináminiki ali gúeminigave.

²¹ Nimisili ve áni hee lamamó nenazo, nenemú není nugulizá lekelitoka minakumule liki lá ilikitanigave.

²² Neza keitoka lemeko utó oko gakó lo keme-mumó nelina, lihimáini minamiline. Lá okamóza, lo kemenoumó nenazo, lihimaváini nana iki ahulatamó neve.

* **15:20:** Mat 10:24; Luk 6:40; Zon 13:16

²³ Lova ali nimiaká nia vegenalite aménehinigi áminagó iki lova ali amiaká niave.

²⁴ Neza holúikú haitó suni golivagi nene vegenalite ali utó amatímini ale utó amumó nelina, keitoka lihimá nomimó minaline. Itó imane alekugo, keza áninigamó ánigi ahulinake, není lova ali nimiaká niake aménehini áminagó iki lova ali nameve.

²⁵ * Lá ikago monó gotolaú gakó makó láa liki luhuva gizinamó nene alévolé oko neve:

Keza nene hanuvamú není lova ali nemeve.

²⁶ Izotipo loló oko luhusatini ale kii liti ve gakó gihilámini amelaho Sikalahú nene aménehitoka noive. Aí amiselekugo, aménehitokatí lemeko mogonáne lo utó inogo ive.

²⁷ Itó lekelisi nene hoza apí ukutí nezagi miniliki itinamó nenazo, lekezagi áminagó iki mogonáne li utó inigave.

16

Sikalahulímini hoza

¹ Alikaloka netá golesa nalilikitikoma, monó ahulikatave loko gakó imane lo nolukumuve.

² Lá iiki monó numutini hizi lí ilikitanigave. Itó gamena makó alitanogo ive. Lá noiko, Ómasi nasahilí notupe liki likipili hilinigave.

³ Keza nene aménehinigi nezagi ánigi hee hee lamiki nene suni alinigave.

⁴ Neza goí oko imane lo nolukumu gakó nene alévolé okiko, ameteho gozapá lo limi gakóma gihila zekave liki gilinigave. Hoza apí u gamenaló

* 15:25: Age 35:19, 69:4

lekezagi minoko aleko ituni gamena hána ha nego lo lekememumóma nemóza,

⁵ itína nene nimisili vémitoka atiginá oko vinogo ugo, lekelikutí ve makolímo hitoka vitane loko loká onetamive.

⁶ Gakó imane lo lekemekugo miluma netalímo likigikagú vaí noize.

⁷ Lá noimóza, neza gakó gihila litoze, gililo. Neza atiginá oko aménehitoka ititomó nenémo netá gihila ale utó oleketanogo ive. Ahulo-likimioko itemulina, hize lé oleketati ve izotipo nene lememiline. Itekinake amiselekugo, lekeli-toka liminogo ive.

⁸ Lemeko mikasiuka monóini nomi vegenalitini lihimáinímini mogona itó hee loko minoko aleko oakalímini mogonamú itó lihima limititímini mogonamú lo utó okiko gili hee hee linigave.

⁹ Keza nenikumú gili alévolé amanazo, lihimáinímini mogonamú lo kemekiko gilitave.

¹⁰ Neza aménehitoka atiginá oko itekugo, goha není ánigaminigi anazo, hee loko minoko aleko oakalímini mogonamú lo kemekiko gilinigave.

¹¹ Imane mikasiuka agulizaki ve Satani lihimamú mota goní okamóma nenazo, goní oakalímini mogonamú lo kemekiko gilinigave.

¹² Gakó lo likimitomó mukí nemóza, itína litá oko lo lekeme asú okugo, gena lekepelekatize.

¹³ Gakó gihilámini amelaho Sikalahú áisi lemekoko gakó gihilagú lekelémoko vinogo ive. Nene ezáa agata geleko lo likimitigopa, nenitokatí itó aménehitokatí gakó geleoko lo likiminogo ive. Lá okoko alika utó iti netakumú lo lekeme lekeme oko minanogo ive.

¹⁴ Gakó nene nenitokatí alekoko lo nolikimioko není nugulizá ale napa inogo ive.

¹⁵ Aménehitokatí netá matá nene nenikó neme asú onoimó neve. Nenemú Sikalahulímo neni-tokatí gakó alekoko lo likiminogo ive loko mota lo lekemekuve.

Miluma gilitamóza miniiki mulúikú agila guluma inogo ive

¹⁶ Lekeza gamena koma niminiki není goha áinigaminigave. Nenémini veletó koma miniiki není goha ániganigave.

¹⁷ Loko lokago, vegenala zuha lugáa leza logele hagele unike gakó imane nana gakó nolive. Gamena koma niminiki není áinigaminigave, itó nenémini veletó koma miniki není goha ániganigave, itó aménehitoka atiginá oko ititove loko nolimó nene nana gakó nolive.

¹⁸ Loko lunike, gamena komamú nolimó nene nana gamenamú nolive. Gakó limó nenémini mogona gelemune.

¹⁹ Loko lokunike, loká otanogo nouko Izesú geleake láa loko lo limimó: Gamena koma niminiki není áinigaminigave, itó nenémini veletó koma miniki není goha ániganigave loko lo lukumumómamú ligili hagili niahe.

²⁰ Lamaná lo likimitoze, gililo. Lekeza nene ive nama iki niminiko, monó gelema vegená nenete kogoliza vizinigave. Itó lekeza miluma giliki minanigave. Lá niiko, ale viligokiko mulutikú agila guluma inogo ive.

²¹ Vená makolímo izegipa getati gamena alitokiko, miluma gilinogo ive. Minoko getoake,

izegipala utó ikumú mulunaú agila guluma itímo miluma gilikumú agatí molanogoive.

²² Lekezagi ámináminiki itína miluma gilitamóza, goha ánígolikimikugo, mulutikú agila guluma inogo ive. Lá okiko, ve makolímo ipá oko ale ahulaminogo ive.

²³ Ámina gamenaló netá matakumú není voká linitaminigave. Neza lamaná lo likimitoze, gililo. Lekeza netá nemú manamú aménehitoka voká litamó nene, áisi není nugulizató likiminogo ive.

²⁴ Lekeza amunaloka miniliki itetó nene není nugulizá ali minake netá matakumú loká amamóma neve. Mulutikú agila guluma itimó nenémo hutilí oko napa oko minative liki voká liiki alinigave.

Mikasiuka netá mukí nene avilegeko nouve

²⁵ Gakó imane lo lekemeve lekemeve omo iteko minumó nene, anoza gakokutí lo lukumumóma neve. Gamena makó alitanogo ive. Neneloka anoza gakó goha lo lekememinogo uve. Aménehini mogona lo utó oko lo likiminogo uve.

²⁶⁻²⁷ Gamena nene zupa není nugulizá ali miniki voká litave. Neza aménehitokatí lumu gakó mota gili alévolé iake, likigika nimikakeve loko aménehiki agika lekemekave. Nenemú lekelikumú aménehitoka voká litove loko nene lo lekememuve.

²⁸ Neza aménehini ahulomikuke mikasiuka lumumó neve. Itó imane mikasi ahulokinake aménehitoka itinogo uve.

²⁹ Loko lokago, izegipala zuhate leza láa loko lo amunimó: Imane anoza lamanike lo utó oko lo lemekane.

³⁰ Nenemú itínasa geikumú nene vegená keza loká miká igitamago geza netá matá mukikumú gele asú onane loko nogulune. Geza Ómasilokatí lemenimó neve loko gele alévolé onoune.

³¹ Loko lokuko, Izesú láa loko lo limimó: Lekeza itínasa gele alévolé okune liki nilahe.

³² Gamena makó alitanogo ive. Alitokiko, není ahulinimiiki hutilí iki numutitoka vi asú inigave. Vikiko, nezánegó minanogo uve. Lá itomóza, aménehiki minanogo usive. Nenemú nezánegó minaminogo uve. Ámina gamena itína mota alitokave.

³³ Není hulu nenémo lekelitoka minative loko gakó imane lo nolukumuve. Lekeza mikasiuka niminiko gopoguni mililikitatamóza, mulutikú golesa gelemilo. Nénisi nene imane mikasiuka mukí netá avilege nou vema nouve.

17

Izesú izegipalamú Ómasiloka limó

¹ Izesú nene gakó lo asú oake, okulumakuka ánigo nomolake láa loko limó: Aménegamaka, gamena mota alitokave. Geza gipakámini lapaná ale utó molokako, gipakámina neza geí lapaná ale utó molatoze.

² Géisi numutó namató vegenalitini améipina nelémo loló animó nene nenitoka kelémo molani vegená nene alévolé kemetameni kimitove loko lá animó neve.

³ Alévolé kemetamenímini mogona lá oko neve: Ómasi gihila hamokó geí mogonaka itó nimiseleni ve gipaka Izesu Kilistó není mogonáne gilíniko, alévolé kemetameni nene utó o kiminogo ive.

⁴ Hoza nememimó nene, ale lutegekuke, mikasiuka geí lapaná ale utó okuve.

⁵ Kee, aménega, mikasi velesá utó amigo gezagi makó okulumá lapanánegi minumó nene itína govogisaló nougo ámina netá goha nemekako ale minatove loko noluve.

⁶ Mikasiuka vegenakutí makó nenitoka kelémo molanimoláa nene mogonaka avetó oko lo keme-noumóma neve. Geí mututoni nenitoka kelémo molokako, keza geí gakó gili alikave.

⁷ Itó nenitoka netá nemó nene geitokatikó neve liki mota gilinave.

⁸ Itó gakó lo nemenimó nene lo kemekugo, mota gili asú inave. Itó géisi nimiselekako geitokatí lumumó neve liki mota gili seketigí ikave.

⁹ Neza keikumule loko geitoka noluve. Monóini nomi vegenakumú lamuve. Nemenimó keza geí mututoni niamó keikumú noluve.

¹⁰ Itó není mututoni nene geí mututoni niave, itó geí mututoni nene není mututoni niave. Itó iki miliki niamó nenémo není lapaná ale utó moloaká noive.

¹¹ Neza mikasiuka minato gamena mota asú noive. Kéisi nene miní amiki niko, neza geitoka mota itinogo uve. Etó keké vizeko noani aménega, geí gugulizá kumumó nenémini zámuzatunú ale gilitokimikako, nenémini agikagú avasavagi minatave. Lá okiko leza ligika hámakó nemómáminoko keza kigika hámakó minatize.

¹² * Kezagi makó minuni zupa nene, neni-toka kelémo molani vegená nene gugulizalímini zámuzatunú gizapa oketoko minugo, nenémini

* 17:12: Age 41:9; Zon 13:18

agikagú minamó. Lá okago, gizapa okimikugo, gopa amamóma neve. Monó gotolaú luhuva gizina gakó makó alévolé itive loko lolímini mututoni hámakó nene latila imó neve.

¹³ Itína geitoka vinogo nouke, imane mikasiuka vegenáne zuhatini mulúikú agila guluma itimó nenémo hutilí oko napa oko minative loko láa loko lo nogumuve.

¹⁴ Neza gakoka lo kemenoumóma neve. Neza mikasiuka mututoni minamuve. Kezagi ámina iki mikasigú mututoni minamanazo, monó gelema vegená nenete lova ali kimiaká niave.

¹⁵ Géisi není vegenáne zuha mikasiukatí kelématane loko lamuve. Ve golesa Satakumú geisa hizeko gizapa oketatane loko lo nogumuve.

¹⁶ Neza mikasigú mututoni minamuve. Itó ámina iki keza mikasigú mututoni minamave.

¹⁷ Gakó gihila kigikagú limitimoláatunú kelémo etó ozo. Geí gakó nene gihila neve.

¹⁸ Géisi nene mikasiuka hoza gakó lonetoko nimiselenimó nenéminoko mikasiuka hoza gakó lokimikuke nokimisuluve.

¹⁹ Geí gakó gihilámo kigikagú lemekoko kelémo etó okiko minatave loko nezáne nigikáne nugupéne ale etó oko nomuluve.

²⁰ Itó neza keikumukó geitoka lamuve. Keza li kimikiko nenikumú gili alévolé ita vegenakumuki geitoka noluve.

²¹ Kigika hamokó miniko minatave loko lo nogumuve. Aménega, geza není akisenane, itó neza geí akisenoumó nene kezagi ámina iki akisikisiko, monóini nomi vegená keza nimiselekako lumumó neve liki gili seketigí itave loko noluve.

²² Leza ligikate hamokó neve. Ámina oko keí kigika hamokó miniko minatave loko lapanaka nemenimó nene ámina oko kemekuve.

²³ Lá umó nene neza nemeni kumugo, itó geza gemeni nemekako, keza kigikatunú múnahiiki hamokó lilí iki minatave loko, itó lá iki niko, monóini nomi vegená kéisi nimiselekako lumumó neve liki gili seketigí itaze, itó gigika nenitoka moloaká noanimó nene ámina oko keitoka moloaká noane liki gili lamaná itave loko neve.

²⁴ Aménega, nenitoka kelémo molani vegená nene keza nénisi minatotoka minatave loko noluve. Neneló niiki nene mikasi utó amigo gigika nenitoka molanike okulumá lapaná lehizenetanimó nene ániigi guni itave.

²⁵ Aménega gehaváamaka, monóini nomi vegená keza geí mogona gili guni amamóza, nénisi nene gelenouve, itó vegenáne zuha nenete géisi nimiselekako lumumó neve liki gilinave.

²⁶ Neza gigika není nemenimó ámina oko keitoka minative loko itó neza ámina oko kigilikaloka minatove loko keí holúikú nene mogonaka lo kemeko minanogo uve.

18

Izesuni amimí okago alemó

(Mat 26:47; Mak 14:43; Luk 22:47)

¹ Izesú eza gakó láa loko lo asú oake, ezagi vegenala zuhagi leza Kitilona nagamí gímuza vola helegaloka vunike, zazuha makokú itunimó.

² Ámina zazuhagú Izesugegi gamena gamena alegesá oaká unimó nenazo, itó amimika liti ve

Zutá ezagi ámina apakumú ánigonoimó nenazo, Izesú neneló noinogo ive loko geleneike,

³ guguni giziaká a ve napagi Palisaio monó vegi niatoka vike Izesuni nene kigizakú molatikumú loká okago, mulusi makokú ami vegi itó monó zagusavegú pilisi ve lugáagi kimisilikago, keza ló ligiki aleke lova hiziaká netá aleke, Zutá kelémo goí igo ámina zazuhaloka Izesú noitoka vamó.

⁴ Vi anitikago, Izesú nene aí amupiló utó iti netá mukikumú geleake, keitoka vike loká oke-take lekeza éhikumú vitagá niave.

⁵ Loko lokago, keza Nasaleté ve Izesunimamú vitagá nounge liki likago, Izesú nene nezama imane nouve loko lo kimimó. Loko lokago, amimika li ve Zutá nene holúikú minake,

⁶ ezagi kezagi Izesú li gakokumú kemegesa-lokatí nivake mikasiló pou liki akimi vamó.

⁷ Lá ikago, goha loká oketake lekeza éhikumú vitagá niave. Loko lokago, keza Nasaleté ve Izesunimú vitagá nounge liki likago,

⁸ Izesú láa loko lo kimimó: Nezama imane noumole loko mota lo lekemekuve. Nenemú nenikumú vitagá niikima, izegipáne zuha imane ahulikimikiko hanuva vitaze.

⁹ Loko lokago, nenitoka kelémo molani veg-utí makó tolova amitive loko amunaloka li gakó nenémo alévolé imó.

¹⁰ Lá okago, Saimon Pitá eza sopoló aleneimó nene golagutí aleko segeake, guguni gizoaká vetini ve napámini gelekelé izegipala agulizá Malakusini apilike, zamagaloka agata zeko isimó.

¹¹ * Lá okago, Izesú nene Pitani láa loko lo

* **18:11:** Mat 26:39; Mak 14:36; Luk 22:42

amimó: Sopollo nene goha golagú ale gúezo. Améneho miluma netá gihitane loko loneton-amóma nenazo, gehemitane loko lá noape, loko limó.

Guguni gizoaká veloka Izesuni alímiki vamó

¹² Lá okago, ami vegi monó gizapa veninigi Zuta vetini pilisi vegi keza Izesuni agizató aliake nagá alemó.

¹³ Nagá aliake, apí iki alímiki viki Kaiapani venalámini amelaho Anasí noitoka alímiki vamó. Kaiapá nene ámina kilisimasi oko novigo Zuta vetini guguni giziaká vetini gizapa ve minake,

¹⁴ * amunaló emane Zuta ve kagata alike leza mukitó helekatunize, ve hamokolímo lelémo nupa napa oko helekiko nenémo netá gihila ale utó oletative loko li ve minamó.

Pitá Izesuni egamega otamó

(Mat 26:69,70; Mak 14:66-68; Luk 22:55-57)

¹⁵ Lá okago, Saimon Pitako Izesuni izegipala zuhagutí ve makó Izesuni ámegetoko vusí ve nene guguni giziaká vetini ve napa nenémo není ánigonoimó nenazo, Izesuki makó vusike guguni giziaká vetini geisa mikú nanitusigo,

¹⁶ Pitá nene geisa gatetoka oteneigo, neza vuke gatetó gizapa noi venáma lo amekuke, Pitani alémoko geisa mikú itusimó.

¹⁷ Itekusigo, ámina venalímo Pitani loká otake geza nene ámina goní nita vémini izegipa zuhagutí makó noape. Loko lokago, Pitá nezama noamuve loko limó.

* **18:14:** Zon 11:49-51

¹⁸ Lá okago, hepé legekago, gelekelé vegi gimisigi vegi keza lóo lotá itune liki ló lokunusa ló gizikago, Pitá nene kezagi ote minake lóo lotá oko minamó.

Guguni gizoaká ve napa nenémo Izesuni loká otamó

(Mat 26:59; Mak 14:55; Luk 22:66)

¹⁹ Lá noigo, guguni giziaká vetini ve napa nenémo izegipala zuhamuki apí o kemeaká i gajokumuki Izesuni loká otamó.

²⁰ Loká omikago, Izesú láa loko lo amimó: Neza numutó namató vegená lo utó okogó lo kemeaká umóma neve. Neza nene lekelí monó numutikú itó monó zagusave napagú lekeza Zuta ve alegesá iaká niató nene gakó apí o kemeaká onouve. Neza nene asugunatoka gakó makó lo kemesá amuve.

²¹ Geza není nene nanamú loká nonetane. Není gakó gilina vegená nene lo kumu gajokumú nanave loko limó neve loko loká oketozo. Lo kemeaká nou gakó nene keza gilinave.

²² Loko lokago, pilisi ve makó áminaló ote minamó nenémo agizanitunú Izesuni napilike guguni gizoaká ve napama nene geza gakó nenémináa nanamú lo namene.

²³ Loko lokago, Izesú láa loko lo amimó: Neza gakó golesa makó lonoitomóma lo utó ozo. Gakó lamaná lo nolukumugo nanamú nonepelene.

²⁴ Loko lokago, Anasí nene nagatunú nene Izesuni agizató goha nagá zeake, guguni gizoaká vetini ve napa Kaiapá noitoka amiselekago alímiki vamó.

Pitá Izesuni goha egamega otamó

(Mat 26:71-75; Mak 14:69-72; Luk 22:56)

25 Lá noigo, Saimon Pitá nene lóo lotá oko oteneigo loká itake gezagi ámina vémini izegipala zuhagutí noape. Liki likago, eza egamega ike neza aí zuhagutí noamuve.

26 Loko lokago, guguni giziaká vetini ve napámini gelekelé izegipala Pitá agata zeko isi vémini zuhagutí ve makolímo loká otake gezagi zazuhagú niasigo ángo noumóma neve, olo.

27 Loko lokago, Pitá goha egamega okago, áminaló litá oko okoloho nenémo anó molamó.

*Izesuni Pilató noitó alímiki vamó
(Mat 27:1-2; Mak 15:1-5; Luk 23:1)*

28 Lá okago, Izesuni nene Kaiapani numukutí alími hetó iake, alímiki agulizaki vémini numutoka vamó. Viake, neteká holugú nego, avóikini asenini zeketakumú gili mina nosá nanigi niake Zuta veta amosá suni aleko hetoka ve makolímini numukú itekinake ligika ale golotuva lokatune liki kezáini nene agulizaki vemámini numukú itemamó.

29 Lá ikago, Pilató nene hetoka lemeake, loká oketake lekeza iki imane ve nanamú goní nitave.

30 Loko lokago, keza láa liki lamó: Imane ve eza netá golesa aleaká ve minamilina, leza agizató aleko geitoka alémoko amutiline.

31 Liki likago, Pilató láa loko li kimimó: Lekezatini agizató aliiki lekezatini li huka gakotinimaló ali miliki goní italo. Loko lokago, Zuta vetini monó gizapa vete zohota zaló hilitive liki giliake láa liki li amemó: Óe, lezatete ve makó apele helesakumú nene lekelí gamanímo óe loko lo hukonoimóma neve.

32 * Liki likago, zohota zaló vegená kepele he-

* 18:32: Zon 3:14, 12:32-33

leaká nene Loma vetini mogona minokago, Izesú nenéminoko hilitove loko amunaloka lo kimi gakó nene alévolé inogo imó.

³³ Lá okago, Pilató goha kugulizaki vetini numukú iteake Izesuni sele lo ameake loká otake geza nene Zuta vetini kugulizaki ve napa noape.

³⁴ Loko lokago, Izesú láa loko lo amimó: Gezaka gagata geleko nene gakó nolape, itó ve makolite nenikumú láa liki li gimikago nolane.

³⁵ Loko lokago, Pilató láa loko lo amimó: Neza Zuta ve nougo nolape. Gezaka vegenakagi itó guguni giziaká ve napagi gilímiki nenitoka iminamóma neve. Geza nana netá golesa loló okako neve.

³⁶ Loko lokago, Izesú láa loko lo amimó: Neza nugulizaki ve napa noumóza, nenémini mogona nene imane mikasigú vetini suni nomive. Imane mikasiuka netá minalina, Zuta vetini kigizakú nilími milikatave liki izegipáne zuhate lova ali utó alinamóza, nugulizaki ve minato mogona nene imane mikasigú vetini suni nomive.

³⁷ Loko lokago, Pilató láa loko lo amimó: Láa lokoma geza nugulizaki ve napa nouve loko nolape. Loko lokago, Izesú láa loko lo amimó: Nene nugulizaki ve nouve loko gezaka mota lokane. Neza gakó gihila lo utó itove loko imane mikasiuka lemekuke, izóneho getokago nouve. Gakó gihila giliaká nia vegená mukilite negepagutí gakó giliaká niave.

³⁸ Loko lokago, Pilató nene gakó gihila nene nana gakó neve.

Loko loake, Zuta vegenatoka hetoka lemeake, láa loko lo kimimó: Imane vémini lihimavalamú

vitagá umó nomive.

³⁹ Lá onoimóza, lekezatini mogona lá oko neve. Avotikini asenini zeketakumú gili mina holisigú kilisimasiló kilisimasiló nene lekezatini ve makolímini agulizá ikago, nagá numukutí ve hamopamó kimisele ahulo ahulo oaká nougo lekelitoka viaká niave. Itó imane gilikiko etokikoma, Zuta ve lekelí agulizaki veliní aseva zemikugo lekelitoka vitihe.

⁴⁰ Loko lokago, keza nene negénegeka lake gakó napagutí nene Óe, aí nomive. Palapasini aseva zetamane. Liki lámó nene Palapasí nene laskoli ve nenaē.

19

Izesú hilitive liki goní itamó
(*Mat 27:15; Mak 15:6; Luk 23:13*)

¹ Lá okago, Pilató lokago, segi nogosanitunú nene Izesuni apiliake,

² agulizaki vema nenaē liki anosa netá lilí itiake ami vete uhenagi nagatunú akilí lilí iki gotolaló hitimiake, ginegane hána luhuvagi okohu gó luhi-tamó.

³ Lá iake, amatoka hizi letiki niake, ganimakilisi i ameke Oga, mokáne, Zuta vetini kugulizaki véinimave. Nilake, kigizanitunú Izesuni agokaló zemó.

⁴ Lá ikago, Pilató nene Zuta ve niatoka goha limike láa loko limó: Ánigalo, lihimavalamú vitagá umó nene nomive liki gilitave loko lekelitoka alémoko nouve.

⁵ Loko lokago, Izesú nene uhenagi akiliki okohu gó luhoake keza niatoka lemeko noigo, Pilató nene nokelepizike imane ve ánenémináa ánígalo.

⁶ Loko lokago, guguni giziaká a ve napa keza vegenáinigi Izesuni ániagiake, gakó gamoga geke zohota zaló apele helemanee. Zohota zaló hilitinae. Liki likago, Pilató nene konotó alike láa loko limó: Neza nene lihimavalamú vitagá umó nomize. Nenemú lekezatini alímiki viki zohota zaló apílilo.

⁷ Loko lokago, Zuta vetini monó gizapa ve keza láa liki lámó: Ezáamú Ómasímini gipala nouve loaká noimóma nenaee. Nenemú ve nenémináa nene hilitave liki lí hukilita gakokú luhuva giz-inamóma nenazo, mota hilitive.

⁸ Liki likago, Pilató nene Ómasímini gipala noive liki lakumú alegesá goha ligimó.

⁹ Alegesá legekago, Izesuni nene goha numukú alémoko itike loká otake géisi hikutí utó animó neve. Loko lokago, Izesú nene anotó alemimó.

¹⁰ Anotó alemigo, Pilató láa loko lo amimó: Geza gakó nene lo nememane. Neza lokugo hanuva minanogo ane, itó nénisi lokugo zohota zaló hilinogo ane. Nenémini zámuza niminamóma nenaee. Nene gelemape.

¹¹ Loko lokago, Izesú láa loko lo amimó: Není gakó litane loko veletokatí Ómasímo zámuza gememilina geza není gakó nana oko latiline. Nene nolanimole. Nenemú nene geitoka nelémo mola vémini lihima givilegeko napa napa neve, loko lo amimó.

¹² Pilató nene gakó geleake, Izesuni nene aseva zetatove lokago, Zuta vete ganimakilisi ake láa

liki lámó: Geza nene imane ve aseva zetatan-imó nene, Loma apatoka agulizaki ve napámini agivelaho minaminogo ane, itó asú igitanigave. Itó makó eza ezámú nugulizaki ve napa nouve loko litimó nene Loma apatoka agulizaki ve napa Sisani aviligitohe loko lova gizo aminogo ive.

¹³ Liki likago, Pilató nene geleake, lokimikago, Izesuni alímiki limikago, gakó lo hukoaká holomaló lemeko minamó agulizá nene Hipulu gakokutí nene Gapatave liaká amó, lelí gakokutí nene geha holomave loko.

¹⁴ Itó avotegini asenini zeketakumú azo holisi minatune liake, netá matá ali vatí niago, holisaká gamena noigo, Pilató nene holomavaló noike, Zuta vetini gizapa ve nene agulizaki velini imane ánigalo.

¹⁵ Loko lo kemekago, keza ganimakilisi ake zohota zaló apele helemané liki likago, Pilató láa loko limó: Íi, agulizaki velinima lekelisi likiko zohota zaló hilitive liki nilahe. Loko lokago, guguni giziaká a ve napa keza gakó láa liki li amemó: Leza nene agulizaki vele makó nomive. Loma apatoka agulizaki ve napa Sisá hámakó noive.

¹⁶ Liki likago, Pilató nene ake, Izesú nene zohota zaló nilitunú ziki apili hilitave loko kigizakú molamó.

¹⁷ Lá okago ami vemate Izesuni alímiake, zohota za amikago, gihigo, apá makó agulizá nene gotóini gonosi helisa apale loko, itó Hipulu gakokutí Goligota loko neneloka alímiki vamó.

¹⁸ Alímiki vake zohota zaló apiliki apatemó. Lá iake, ve golesa lositá luga luga kipiliki apatemó. Izesuni nene holukú hizi otitamó.

19 Lá ikago, Pilató lokago nene, Izesuni gotolaló zaló luhuva láa liki gizikago minamó: Nasalete numutotí Zuta vetini agulizaki venini Izesú ave.

20 Nene mikasi Zelusale numuni símekaló minanazo, Zuta vegená mukí vigá igá niake ámina luhuva gatamó. Nene luhuva nene Hipulu gakokutí itó Loma gakokutí itó Kiliki gakokutí luhuva gizikago minamó.

21 Lá ikago, Zuta vetini guguni giziaká a ve napa keza Pilatoni láa liki li amemó: Zuta ve lelí agulizaki veve loko luhuva gizamoko, neza Zuta vetini nugulizaki ve nouve loko limó neve loko gizamane.

22 Liki likago, Pilató nene mota luhuva gizokutó neze, ha minatize, loko limó.

Izesuni zohota zaló apelemó

(Mat 27:32-44; Mak 15:21-32; Luk 23:26-43)

23 Lá okago, ami ve keza Izesuni nene zohota zaló apiliki apatiake, gineganeva gona miliake, losive losive okago, amelaho ve lilí i asú amó. Lá ikago, gola hána miní amiki akotamamó mukipa gó minokago,

24 * nenemú láa liki lamó: Hukoko alesá golesa okatize, nenemú zohikú molokuko winititímo nene amelaho ve loló itive. Liake lá ikago, monó gotolaú nene není ginegane ali gona miliki, nugu-peló netá nene zohikú milikamó neve liki luhuva giza gakó nene alévolé imó.

25 Ami ve keza nene lá niago, Izesuni zohota za mogonagú nene vegená lá iki minamó: Izolahiki

* 19:24: Age 22:18

atolahiki itó Kolopani venala Maliaki itó Magatala numutotí Maliá makoki.

²⁶ Neneló Izesú agika ameká i veve liki lina ve nezagi makó nouko, Izesú nene izolahini láa loko lo amimó: Vená geza ánigozo. Ve imane gipaka loló noive.

²⁷ Loko loake, láa loko lo nimimó: Vená imane ánigozo. Geí izokahove. Loko lokago, ámina game-naló Izesuni izolahini alémoko vuke numúneuka minoko aleko usimó.

Izesú hilimó

(Mat 27:45-56; Mak 15:33-41; Luk 23:44-49)

²⁸ * Izesú nene mota hoza ale asú okuve loko geleake, gihila zitive loko monó gotolaú mína gakó makó láa loko limó: Nagamikumú nivisekave.

²⁹ * Loko lokago, neneló lape makokú ekesá vain nagamí lagasó ma nego, nenegú notunigitana netá nagamí ziake, zokaitunú hiziake agepagú amikago, namó.

³⁰ Vain nagamí nene noake, sele like mota hozane ale lutegekuve. Loko loake, gotola nene gupá zeake sikalahula ahuloake hilimó.

Izesuni alómusagú zokaitunú hizemó

³¹ Lá okago, Zuta vetini monó gizapa ve keza gó lokiko avóikini asenini zeketakumú gili miniaká a holisigú minanigi netá ali vatí niake, ámina holisi nene napa napa nenazo, itó Mosé ve makolímini gonosiva nene límugusigú zaló minatimó etamitive loko lo mola gakó gili minake, Pilatoni láa liki li amemó: Ami ve makó kimiselekako, viki ámina

* 19:28: Age 22:15 * 19:29: Age 69:21

vetini kigisa helisáini zi letiiki gonosíini nene zalotí aliliki limiki gale zikitatave loko noune.

³² Liki likago, gele kemekago, ami ve keza golesa netá alesi ve Izesuki makó kepele vetosini kigisa helisa zi letiake,

³³ viki Izesuni ánígamó nene mota helekago, ánígiake, agisa helisa nene zi letamamó.

³⁴ Lá okago ami ve makolímo zokaitunú nene alómusagú hizekago, golanigi nagamiki nene áminagutí litá oko limimó.

³⁵ Nene suni nene nogómula gihilatunú ánígokuke lo utó noumó nene soza nomive. Gakó gihila neve loko gelekuke lekeza ámina gakó gili seketigí itave loko gizo nolukumuve.

³⁶* Monó gotolaú anoza gakó makó lá oko nemó nene, gihila zitive loko ámina suni utó imó: Lekeza nene helisa nene ma zi letaminigave.

³⁷* Itó monó gotolaú gakó makó lá oko neve: Keza nene zokaitunú hiziki hokolota ve nene ániganigave.

Izesuni gale zitamó

(Mat 27:57-61; Mak 15:42-47; Luk 23:50-56)

³⁸ Lá okago, Alimataia numutotí ve Zosehé áisi Zuta vetini monó gizapa vemú ahelele vizigo minake, asuguná oko Izesuni izegipala mina vémo Izesuni gonosiváa aleko vitohe loko Pilató noitoka voko loká okago, Pilató gele amekago, gonosiváa nene zohota zalotí apasoko aleloko lemekago,

³⁹* Nikotemó nene amunaló emane límugusigú Izesutoka vi vemámo anuva netupa meseme

* **19:36:** Gá 12:46; Nam 9:12; Age 34:20

* **19:37:** Zak 12:10; Ali

1:7 * **19:39:** Zon 3:1-2

lamanalímini lositá ale gopa oake, sigeliló molamó genava nene 35 kilo okago, geheko vimó.

⁴⁰ Lá oake, Zosehé alémo vatí igo, Izesuni gonosiváa nene ámina netupa meseme hilimikasike, gó gizopa lamanatunú asapú itasimó nene Zuta vete gonosi miliaká a suni alesimó.

⁴¹ Itó Izesuni apele mikasi agilikaloka zazuha makó minamó. Nenegú geha mulí makó goló vatikago, nego, vegená nenegú gale zikitamago hanuva gosohá minamó.

⁴² Lá okago, holisi gamena mota alitokamómave loko hoza alita gamena asú okago, itó ámina geha mulí nene alitó minamó nenazo, nenegú Izesuni gonosiváa milasimó.

20

Izesú heleneikutí otimó

(Mat 28:1-8; Mak 16:1-8; Luk 24:1-12)

¹ Holisi napa Sategú nene gó lo mikasiló amigo, Magatala numutotí vená Maliá nene gonosi apató vo aniteake áinigamó nene agepaló gehani napa mili lí amóma ahelú ali ahulinago áníhoake,

² lolu loko vike Saimon Pitanigi nezagi ángolimiake, láa loko lo limimó: Guivahanímini gonosiváa mota aliki vikave. Itó nene hikú milamó netive. Leza gelemune.

³ Loko lokago, Pitaki nezagi gonosi apatoka makó vusimó.

⁴ Gapoló lolu loko novusike, neza nene Pitani avilegeuke litá oko gonosi galeló vo anituke,

⁵ gava hizeko áinigumó nene, nagá like gokó nego áinigumóza, áminagú itemuve.

⁶ Lá okugo, Saimon Pitá nene alika oake geha mulí agikagú iteko áinigamó nene, mokoná lavolavo asapú amóma nene nego,

⁷ itó gotolaló asapú ita gó nene haitó gakeko nego áinigamó.

⁸ Lá okago, nénisi goí oko anitumóma nemóza, alika áminagú itekuke, ámina netakó nego ánigouke, lamaná oteko iteko vokave loko gele seketigí umó.

⁹ Amunaloka nene monó gotolaú Izesú he-leneikutí oteko ititive liki gakó gizamó nene gele hee lamusimó.

¹⁰ Itó leza nene goha numutoka atiginá oko vusimó.

Izesú Magatala numutotí vená Maliatoka utó o amimó
(Mak 16:9-11)

¹¹ Vokusigo, Magatala numutotí vená Maliá eza nene gonosi galeló goha vike hetoka ive oko minatotí nene galegú ániganogo gava hizeko áinigamó nene,

¹² ageló lositá Izesuni gonosiváa goí oko mina galeló gó gizopa luhiki minasike mitó niasigo áinigamó. Makolímo gotolaló minamó. Makolímo agisaloka minamó.

¹³ Minasike vená geza nanamú ive noane liki likasigo, iza láa loko limó: Není Guivahanímini gonosiva aliki vikago, hitoka aliki vahe loko vitagá nouve.

¹⁴ Loko loake, mino viligoko áinigamó nene Izesú noigo áinigamóza, agoka agepa ángo vevesamimó.

¹⁵ Ángo vevesamigo, Izesú loká otake vená geza nanamú ive noane itó éahikumú vitagá noane. Loko lokago, eza nene zazuhagú hoza aleaká ve

noihe loko láa loko lo amimó: Ve lamanámaka, géisi nene gonosivama aleko voko makokuka molonoi-tanimó nene, lo nemekako aleko vitove.

¹⁶ Loko lokago, Izesú nene Maliazo lokago, eza viligoko Zuta gakokutí laponi, lelí gakokutí nene monó gizapa venemaka.

¹⁷ Loko lokago, Izesú láa loko lo amimó: Neza nene aménehitoka velesá itemumó nenazo, nenemú nunukemo. Geza nene voko izegipa nugunamotamónema není améneho nene lekelí ametipove, itó není Ómasi nene lekelí Ómasi noitoka itinogo uve loko lo kemezo.

¹⁸ Loko lokago, Magatala numutotí vená Maliá eza atiginá oko vike Izesuni vegenala zuha nene neza Guivahani áinigokugo gakó láa loko lo nemekave, loko lo limimó.

*Izesú izegipala zuha niatoka utó o kimimó
(Mak 16:14-18; Luk 24:36-49)*

¹⁹ Loko lokago, ámina holisi napagú límugusi zekago, izegipala zuha leza Zuta vetini monó gizapa vemú lelegesá legekago, numukú itekunike gahe etoha oko gekunike nouko, Izesú nene holutegú utó oake ote minake hulu nene lekelitoka minino.

²⁰ Loko lo lemeake, agizani lositá nolelepizike, alómusagú hize ahúma lelepizekago, izegipala zuha leza Guivahanima áinigokunike mulutegú lamaná gulune.

²¹ Lá okuko, goha láa loko limó: Hulu lekelitoka minino. Améneho nimisilimó áminagó oko lekelí nolikimisuluve.

²² Loko loake, huhu loletake, láa loko limó: Ómasímini Sikalahú alilo.

²³ * Lá iiki vegenalitini lihimáini liki ahulatamó nene, asú itive. Liki ahulamitamó nene hanuva minative, loko limó.

Tomasí Izesú goha otikumú gele alévolé amimó

²⁴ Ligiveteho makó agulizá Tomasí agulizá makó Lopé áisi nene makotoka noigo Izesú utó o limimó.

²⁵ Utó o lemekago, ve agivelage leza makó zupa Tomasini áinigokunike avetó oko leza Guivahanima áinigokune. Loko lo amekuko, eza limó: Nezáne nogómulatunú agizató ahúma áinigamoko itó nigizanitunú ahúmaló ale gelemoko, itó alómusalokama ale geleko áinigaminake, gakotini nene gele alévolé aminogo uve.

²⁶ Loko lokago, holisi makó alitokago, izegi-pala zuha leza Tomasigegi nene numuni makokú goha ale nupa unike gahe gekunike nouko, Izesú nene ligilikagutí utó oake noike, hulu lekelitoka minino.

²⁷ Loko lo lemeake, Tomasini láa loko lo amimó: Gigizani hisukatunú nigizatoka nuhúma ale geleko ánigozo. Itó gigizani ahuloko nolómusaloka ale gelezo. Lá okoko gagata losi gelemoko gele alévolé ozo.

²⁸ Loko lokago, Tomasí nene Guivahanínemakave, itó Ómasinemakave.

²⁹ Loko lokago, Izesú láa loko lo amimó: Géisi áinigokanike gele alévolé okane. Není áinigamake gili alévolé iaká nia vegenakumú gulugo lamaná okave, loko limó.

Zoní giza luhuvámini mogonáa

* **20:23:** Mat 16:19, 18:18

³⁰ Itó Izesú nene izegipala zuhatini lovogisalo lu avevezaha la avevezaha mukí loló imó nene imane luhuvagú gizo asú amumóza,

³¹ imane gizonoumoláa lekeza gatiki giliiki Izesú nene gologí oletative loko lo mololeta vema Ómasímini gipalave liki aikumú gili alévolé i miniki alévolé lekemetameni alitave loko gizonoumole.

21

Izesú izegipala zuha makoláaloka utó o kimimó

¹ Itó minoko izegipala zuha leza Tipelia nonohu-lotó voko nouko, Izesú nene haitó suni aleko utó o limimó.

² Saimon Pitaki lopé izegipa Tomasiki Galilaia mikasigú Kana apatotí ve Natanaeki nezagi uvónehiko losigi aí izegipala zuhagutí makó losimagi leza alegesá oko nouko,

³ * Saimon Pitá nene neza lagaha alinogo novuve. Loko lo lemekago, lezagi makó vitune loko lokunike, sipigú itekunike vunimó. Voko minunike ámina holugú lagaha alemunike lá ova ova oko nouko,

⁴ gokululuva notovo igo, Izesú nene getatoka melane minamóza, izegipala zuha leza Izesuni ameni ánigo guni amuko,

⁵ Izesú loká oletake izegipaguvo, lagaha ma alehe. Loko lokago, leza Óe, alemune.

⁶ * Loko lokuko, láa loko lo limimó: Gotaha ali zamagaloka miliki ahulatamó nene lagaha alinigave. Loko lokago, gotaha ale zamagaloka molokunike, lagaha vauva aleko alunimó nene

* 21:3: Luk 5:5 * 21:6: Luk 5:6

gelelehá unimóza, vaí okago, keé loko ale otemuhá.

⁷ Lá okuko, Izesú ameni nemeaká i veve liki lina ve neza nene Guivahanima nena loko Pitani lo amekugo, Saimon Pitá neni gakó geleake, agupe zapakó minatotí ginéganeva ale luhoake, nagamikú olío lemeake, galanogosá zeko 100 mitagitana oko voko nagamí getatoka vo anitekago,

⁸ ve lugáa leza nagamikú lapegú lagaha gotaha gelelehá oko aleko vuhá.

⁹ Voko getatoka itekunike netá makó lá oko ánigunimó. Ló nokusa ale hitikakú lagahagi peleti makoki nego ánigunimó.

¹⁰ Nániguko, Izesú nene lagaha itína alemómagutí lugáa alikalo.

¹¹ Loko lo lemekago, Saimon Pitá nene sipigú iteake gotaha gelelehá oko getatoka ale moloake lagaha napa 153 nene gotahagú vaí iki minamóza, gotaha nene alegetá vizemimó.

¹² Lá okago, Izesú nene iki neteká nosá nalo. Loko lo lemekago, izegipa leza Guivahanimave loko mota gelenounimómaló nenazo, geza éagama noane loko loká otamune. Loká otamuko,

¹³ Izesú oake, peletigi lagahagi aleake gona moloko limimó.

¹⁴ Lá imó nene Izesú heleneikutí oteake minake izegipala zuha lelitoka utó o limigo ániguni gamena neneló losive makole loló imó.

Není sipsip izaló nosánetá kemeko gizapa oke-tozo

¹⁵ Neteká nosá no asú okuko, Izesú nene Saimon Pitani láa loko loká otamó: Zonini gipala Pitao,

gigive keza kigika nimiaká niamó nene kivilegeko gigika nemeaká noape. Loko lokago, Pitá nene Guivahanínemaka, geikumú geleaká noumó nene gelenanimole. Loko lokago, Izesú nene vegenáne zuha kigikámini nosánetá mí zeko kemeko nozo.

¹⁶ Loko lo ameake, goha lo amike Zonini gipala Pitao, geza lamaná gigika nemeaká noape. Loko lokago, Pitá nene Guivahani neza geikumú geleaká noumó nene gelenane. Loko lokago, Izesú nene vegenáne zuha lamaná oko nasahilí oketozo.

¹⁷ Loko loake, miní ameko loká otake Zonini gipala Pitao, geza nenikumú geleaká noape. Némika loko loká otamó nene gamena losive makole imó nenemú Pitá agika hizekago lo amike limó: Guivahanínemaka, mukí netakumú gelenanimole. Neza geikumú geleaká noumó nene gelenane. Loko lokago, Izesú láa loko lo amimó: Geza nene vegenáne zuha lamaná oko gizapa oketozo.

¹⁸ Lamaná lo gimitoze, gelezo. Geza gosohá ve minanike holotaka nene gohakaló ze gilitokanike, gapo neloka manaloka vitove loko gagata geleanike voaká animóma neve. Lá onoimóza, minoko ozaha molokoko gigizani lutooko noako, ve makolímo holotaka zegimioko vamitove litanitoka gelémoko vinogo ive.

¹⁹ Loko Izesú nene Pitá minoko nenémini oko zohota zaló noheleko Ómasímini agulizá alémo kegesative loko anoza gakó limó. Loko loake, miní ameko némegetoko ano loko lo amimó.

Izesuni izegipala gihiláa

²⁰ * Loko lokago, Pitá viligoko Izesú ameni ne-meaká i veve liki lina ve není ánígamó. Neza amunaló nosá nuni zupa Izesuni amatoka minuke nene Guivahanínemaka, éaho gimimika litikumú nolane loko lu ve minumó nenazo,

²¹ Pitá nene nenikumú Izesuni loká otake imane ve nana itimó neve.

²² Loko loká omikago, Izesú láa loko lo amimó: Áisi hanuva agómulagi noiko nénisi atiginá itove loko lokugoma, geí netá nehe, olo. Geza nene hanuva némegetoko ano.

²³ Loko li gakolímo hutilí oko vokago, vegenala zuha keza nenikumú nene helemínogo ive liki gelemóza, Izesú nene gakó némika loko lamike, áisi hanuva agómulagi noiko nénisi atiginá itove loko lokugoma geí netá nehe lokogó limó.

²⁴ Itó Izesuni izegipala neza ámina netá ánígoko gelekuke, lo utó mólolo aí mogonamú luhuva imane nogizuve. Leza mukilite nene imane luhuva gizonou gakó nene gihilave loko gele-noune.

²⁵ Itó Izesú oko moloko imó nene nana oko gizo asú itune. Ha nenazo, gizo asú uhá minalina, nagata gulumó mikasiuka ma asú amiline.

* **21:20:** Zon 13:25

Monoq Gotola Gosohaq
The New Testament in the Alekano (Gahuku)
Language of Papua New Guinea
Nupela Testamen long tokples Alekano (Gahuku) long
Niugini

Copyright © 1973, 1986 Bible Society of Papua New Guinea

Language: Alekano (Gahuku) (Alekano or Gahuku)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 18 Mar 2025 from source files dated 31 Aug 2023

44bc4c3c-532b-5251-95bd-2c3cfdce78ba